

四庫全書

集部

欽定四庫全書

集部  
梁文紀卷四

詳校官庶吉士臣瑚圖禮

主事銜臣徐以坤覆勘

總校官進士臣楊懋珩

校對官中書臣王鍾泰

謄錄監生臣熊灝

欽定四庫全書

梁文紀卷四

明梅鼎祚編

元帝

名繹字世誠武帝第七子封湘東王為荊州刺史簡文帝被弑即帝位於江陵三年為西

魏攻陷帝為  
廟曰世祖

與劉孝綽書

孝綽為廷尉正攜妾入府被劾免官時世祖為湘東王出鎮荊州與孝綽書孝綽答之

顏之推家訓云梁孝元在荊州有丁峴者洪亭民頗善屬文工草隸孝元書記一皆使之

君屏居多暇差得肆意典墳吟詠情性比復希數古人

不以委約而能不伎癢且虞卿史遷由斯而作想摛屬  
之興益當不少洛地紙貴京師名動彼此一時何其盛  
也近在道務閒微得點翰雖無紀行之作頗有懷舊之  
篇至此已來衆諸屑役小生之詆恐取辱於廬江遮道  
之姦慮興謀於從事方且褰帷自厲求瘼不休筆墨之  
功曾何暇豫至於心乎愛矣未嘗有歇思樂惠音清風  
靡聞譬夫夢想溫玉飢渴明珠雖愧卞隨猶為好事新  
有所製想能示之勿等清慮徒虛其請無由賞悉遣此

代懷數路計行遲還芳札

劉孝綽答湘東王書

伏承自辭皇邑爰至荆臺未勞刺舉且擣高麗近雖預  
觀尺錦而不覩金玉昔臨淄詞賦悉與楊脩未殫寶笥  
顧慙先哲渚宮舊俗朝衣多故李固之薦二邦徐珍之  
奏七邑威懷之道兼而有之當欲使金石流功恥用翰  
墨垂跡雖乖知二偶達聖心爰自退居素里却掃窮閑  
比揚倫之不出譬張摯之杜門昔趙卿窮愁肆言得失

漢臣鬱志廣叙盛衰彼此一時擬非其匹竊以文豹何辜以文為罪由此而談又何容易故韜翰吮墨多歷寒暑既闕子幼南山之歌又微敬通渭水之賦無以自同獻笑少酬褒誘且才乖體物不擬作於玄根事殊宿諾寧貽懼於朱亥顧已反躬載懷累息但瞻言漢廣邈若天涯區區一心分宵九逝殿下降情白屋存問相尋食堪懷音矧伊人矣

並梁書

與蕭挹書

閱別情顏忽焉已久未復音息勞望情深暑氣方隆恒  
保清善握蘭雲閣解紱龍樓允膺妙選良為幸甚想同  
僚多士方駕連曹雅步南宮容與自玩士衡已後惟在  
茲日唯昆與季文藻相輝二陸三張豈獨擅美比暇日  
無事時復含毫頗有賦詩別當相簡但衡巫峻極漢水  
悠長何時把袂共披心腹

答劉縉求述制旨義書

縉字言明昭之子為尚書祠部郎藝文類聚

作縮誤

學山學海未臻其極為龍為光或從王事所賴昔經陝  
服頗足良書憑几據梧靜供遊目枕中之記即用為枕  
帷前之帙仍可為帷對此自娛敬以待命叩而必應已  
謝懸鐘汲而無竭復垂井養

與學生書

吾聞斲玉為器喻乎知道惟山出泉譬乎從學是以執  
射執御雖聖猶然為弓為箕不無以矣抑又聞曰漢人  
流麥晉人聚螢安有挾冊讀書不覺風雨以至朗月



章奏不知爍火為微所以然者良有以夫可久可大莫過乎學求之於已道在則尊

答齊國餉雙馬書

名重挂條形圖柳谷襄陽地穴近求未易滇池水裏遠訪猶難價匹龍媒聲齊驥子河清耀采似伏波之鑄銅震象飛文笑東瀛之刻玉加以控斯銀勒利此金銜鞍揭鏤衢光含兩月繡縈紫縷色麗雙絲方嗤晉后恒乘

鄭國之駟更鄙曹君惟餉蜀王之馬

兩月尺牘  
作日月誤

又

於戲馬之為用遠矣大矣斯所以乾為脊馬震為馬足  
有是哉有是哉何則泮渙而馳可以及日躊躇而蹠可  
以追風赤兔之騰聲的顙之濟主陳王有勒羈之說班  
生有繯絆之談抑聞斯美遠勞此費懷哉懷哉老生不  
云乎雖有拱壁以先駟馬良用此道中心藏之何日忘

之

並藝文類聚  
續作半汗勒羈

泮渙尺  
作昭羈

賜劉璠書

璠字實義沛國沛人歸  
周歷隴右總管府司錄

元帝承制授璠樹功將軍  
鎮西府諮議參軍賜書

鄧禹文學尚或執戈葛洪書生且云破賊前修無遠屬

望良深

答顏之儀

之儀字子升瑯琊臨沂人入周  
歷御正中大夫終隋集州刺史

初之儀父協為元帝湘東王府記室叅軍之  
儀博涉羣書獻神州頌詞制雅贍手敕報之

北史獻

荊州頌

枚乘二葉俱得游梁應貞兩世竝稱文學我求才子鯁

慰良深

並周書

責鮑泉書

泉字潤岳東海邳人為世子方諸邳州長史城陷見殺

泉美鬚髯善舉止元帝承制累遷信州刺史專征長沙久而不尅帝乃數泉二十罪為書

督責之

面如冠玉還疑木偶鬚似蝟毛徒勞繞涿

南史張裕傳

今本作  
喙誤

遺周弘直書

弘直見陳

弘直兄弘正為國子博士及侯景亂京城陷弘直為衡陽內史元帝在江陵遺弘直書

適有都信賢兄博士平安但京師搢紳無不附逆王克

已為家臣陸緬身充卒伍惟有周生確乎不拔言及西  
軍潺湲掩淚恒思吾至如望歲焉松栢後凋一人而已

與周弘正書

弘正  
見陳

王僧辯之討侯景也弘正與弟弘讓自拔迎  
軍僧辯甚喜即日啓元帝帝手書與弘正及  
至授黃門侍  
郎直中書省

獯醜逆亂寒暑亟離海內相識零落略盡韓非之智不  
免秦獄劉歆之學猶弊亡新音塵不嗣每以耿灼常欲  
訪山東而尋子雲問關西而求伯起遇有今信力附相

聞遲比來郵慰其延佇

並陳書

與武陵王紀書

紀字世詢高祖第八子

紀為都督益州刺史及侯景陷臺城武帝密敕加紀侍中驃騎大將軍太尉承制大寶元年六月紀移告諸州征鎮元帝時為湘東王是年十一月報紀以武帝凶問紀總戎將發益鎮帝使胡智鑑至蜀書止之又別紙云

蜀中斗絕易動難安弟可鎮之我自當滅賊

別紙

地擬孫劉各安境界情深魯衛書信恒通

並南史

## 又與武陵王書

紀偕號於蜀以承聖二年夏五月次于西陵  
世祖與紀書仍許其還蜀專制岷方紀不從  
命報書如家人禮已而破其將侯叡諸軍並  
西赴又與紀書紀兵敗遣使江陵論和緝之  
計元帝拒而不許兵敗見殺王云元帝猜  
刻殘忍行若豺狼而以彌文飾之往往如此

皇帝敬問假黃鉞太尉武陵王自九黎侵軼三苗寇擾  
天常喪亂獠醜憑陵虔劉象魏黍離王室朕枕戈東望  
泣血西浮殞愛子于二方無諸侯之八百身被屬甲手  
貫流矢俄而風樹之酷萬恨始纏霜露之悲百憂繼集

扣心飲膽志不圖全直以宗社綴旒鯨鯢未翦嘗膽待  
旦龔行天罰獨運四聰坐揮八柄雖復結壇待將寨帷  
納士拒赤壁之兵無謀於魯肅燒烏巢之米不訪於荀  
攸才智將殫金貝殆竭倘無寸助險阻備嘗遂得斬長  
狄於駒門挫蚩尤於楓木怨恥既雪天下無塵經營四  
方專資一力方與岳牧同茲清靜隆暑炎赫弟比如何  
文武具僚當有勞弊今遣散騎常侍光州刺史鄭安忠  
指宣往懷



又紀別字  
大智

甚苦大智季月煩暑流金鑠石聚蚊成雷封狐千里以  
茲玉體辛苦行陣乃眷西顧我勞如何自獯醜憑陵羯  
胡叛渙吾年為一日之長屬有平亂之功膺此樂推事  
歸當璧儻遣使乎良所遲也如曰不然於此投筆友于  
兄弟分形共氣兄肥弟瘦無復相代之期讓棗推梨長  
罷懽愉之日上林靜拱聞四鳥之哀鳴宣室披圖嗟萬  
始之長逝心乎愛矣書不盡言

並梁書  
南史作布  
遲

與魏書

武陵王紀帥兵東下梁主譚甚懼與魏書宇文泰曰取蜀制梁在茲一舉遣尉遲迥自散關伐蜀下之

子糾親也請君討之

李文子  
蜀鑑

慶南郊啓

大裘而冕陶匏以質黃鍾既奏雲門斯舞樂諧六變歌  
陳九德感天動神式展誠敬

慶東耕啓

伏惟陛下敬授民時造幄籍圃漢之元鳳未足捧羈晉  
之太始非堪扶輶但承明侍從即事未由周南留滯伏  
深戀仰

上穀充軍糧啓

臣聞金城千仞必資守粟革車千乘其在饋實願武車  
綏旌列飛鴻之行陳奉辭受賑拚摯獸於羆虎賈逵渠  
水雖曰難蹤梁習勸農竊知自勉

謝敕賜第啓

竊以漢賜五倫寔云清吏魏寵衛臻用旌庸直未如靈  
光輪奐睢陽爽塏北連城闕有似甄侯之舍東壁市鄺  
榮深豫章之圃昔狼望未平冠軍辭宅馬池猶隔雍丘  
讓邸臣慙霍曹遠志但識君命無違再思庸陋九殞非

答

賜初學記作錫圃  
作門霍曹作曹霍

謝上畫蒙敕褒賞啓

臣簿領餘暇竊愛丹青雲臺之像終違髣髴宣室之圖  
更難議擬成蠅罕術畫馬踈才人非世將恩深晉帝之

賞跡愧景山寵踰魏皇之詔

謝敕賜褥啓

昔漢后錫貂魏君送褥未有玄兔來王黃龍作貢便覺  
肅脊非遙挹婁無遠

謝賚車螯蛤蜊啓

車螯味高食部名陳物志蛤蜊聲重前論見珍若士竝  
東海波臣西王母藥雀文始化燕羽猶在體潤珠胎形  
隨月減

啓東宮薦石門侯啓

切以鳳鳴朝陽必資藍田之寶龍門點額亦俟堂溪之  
珍是以紫玉見稱黃金為貴文傳夢鳥學重靈蛇點漆  
凝脂事逾衛玠渾金璞玉才足山濤昔翟陽隱逸見稱  
庾亮陳平器局被薦無知以人廢言誠增悚讦進賢上  
賞伏待慈照

上東宮古跡啓

師宜八分之巧元常三體之妙史籀李斯之篆梁鵠曹

喜之書莫不摠華桂宮盈滿甲館竊以鸞驚之奇既聞  
之於索靖鷹跼之巧又顯之於蔡邕是以游霧重雲傳  
敬禮之法鳥頡魚頡表揚泉之賦頗好六文多慙三禮  
尚方大篆既其牢落柱下方書何曾髣髴空慕河間之  
聚書竟微東平之獻表齊攸尺牘顧已缺然北海楷隸  
終成難擬

奇一作勢

謝東宮賚陸探微畫啓

工踰畫馬巧邁圖龍試映玉池即看魚動還傷金屏復

疑蠅集史遷暫覩懸識留侯之貌漢帝一瞻便見王嬙之像

謝東宮賜白牙鏤管筆啓

春坊漆管曲降深恩北宮象牙猥蒙霑逮雕鐫精巧似  
遼東之仙物圖寫竒麗笑蜀郡之儒生故知嵇賦非工  
王銘未善昔伯喈致贈纔屬友人葛龔所酬止聞通識  
豈若遠降鴻慈曲覃庸陋方覺瑠璃無當隨珠過侈但  
有羨卜商無因則削徒懷曹植恒願執鞭



謝東宮賜彈碁局啓

繹本慙游藝彌愧拂巾鳳峙鷹揚信難議擬鳥跂星懸  
曾何髣髴蓮花未易玉屑不工緣邊之法庶遵細柳之  
陣徘徊之勢方希明月之樓子桓有錫聞於遼古季緒  
蒙賜即事可傳

謝東宮賚貂蟬啓

挹婁之毳曲降鴻恩麗水之珍復蒙殊獎東平紫貂之  
賜非聞暖頌中山黃金之錫豈曰附蟬坐變仲尼之容

增暉允南之貌

謝東宮賚寶枕啓

泰山之藥既使延齡長生之枕能令益壽黃金可化豈  
直劉向之書陽燧含火方得葛洪之說况復重安玳瑁  
獨勝瑰材方松非匹稱榴未擬

謝東宮賚辟邪子錦白褊等啓

伏承賚辟邪子錦白褊等者江波可濯豈籍成都之水  
登高為豔取映鳳皇之文至如鮮潔齊紈聲高趙縠色

方藍浦光譬靈山試以照花含銀燭之狀將持比月亂  
合璧之暉

謝東宮賚塵尾錦帔團扇等啓

揚雄口訥本貴談端田蚡貌寢終於麗飾始興之扇方  
斯非擬鄴中之錦匹此為輕方願弘此仁風既動承華  
之氣服茲懷袖復比文若之香

謝東宮賚花釵啓

白孔六帖  
作簡文帝

芑亂九衢花開四照田文之珥慙於寶菜王粲之詠惡

此乘蓮九宮之璫豈直黃香之賦三珠之釵敢高崔瑗  
之說況以麗玉澄暉遠過玳瑁之飾精金曜首高踐翡  
翠之名

為妾弘夜妹謝東宮賚合心花釵啓

未得投壺先應含笑不因鸞鳳自能歌舞夜妹昔往陽  
臺雖逢四照曾游澧浦慣識九衢未有仍伐爵釵還勝  
翠羽飾以南金裝茲麗玉脩靡夫人本分章華之裏中  
山孺子獨荷春宮之恩有志當熊無期投閣

尺牘竟作  
弘夜妹誤

為妾夏玉安豐謝東宮賚錦啓

舒將竝石堪來暮雨縈持結纜刺可蕩舟秦川書字妙  
能八體鄴縣登高真堪九日宋姬贈馬未足為榮馮媛  
乘車方茲非寵

謝東宮賚瓜啓

金榮始薦瓊蕊載珍味奪蔗漿甘踰石蜜

謝東宮賚蒸栗牛啓

色似祕府之書毛類陳王之玉騂角未奇瑩蹄非貴

謝晉安王賜馬啓

繹武媿仲都遂蒙大驪之錫儒謝春卿空頌名馬之賚  
故以取方驎友自足龍媒不待景公婉如齊畫無勞馬  
援翻等漢銅豈有滅沒黑龍連翩白馬錢文見重津名  
取貴相彼騏驎猶深戀主矧伊伏櫪彌結懷恩

並藝文  
類聚

薦鮑幾表

幾梁書  
作機

臣某言臣聞思皇多士仄陋所以明敎疇咨熙載髦俊  
所以並作斯固殷殿初基拾龍淵之寶虞祠始構獻鳳

管之玉旌蒲出魯賁帛歸齊頌聲既興盛業斯在伏惟  
陛下則天緯地乘正馭才沙汰八風澄明六合叶龜登  
夢之客日賁於丘園韋韞投釣之臣相望於魏闕故以  
物無遺寶矣振鷺有充庭之謳白駒罕空谷之詠洋洋  
濟濟無得而稱者焉臣誠愧知才職非選舉竊以進賢  
上賞蔽賢顯戮敢緣斯義用舉所知伏見臣府中錄事  
叅軍東海鮑幾年五十有七字景玄門庭雍睦立身貞  
退博涉文史頗閑刀筆忠公抗直出宰廉平雅志弘深

安貧專靜解巾入仕三十餘年自遊臣府一紀于茲前  
宰東邑實有二魯之風近處南臺欲尊兩鮑之則伏揆  
天嚴已當簡在脫蒙顯居良局登以清貫將齊毛玠古  
人之服實同吳隱酌水之廉昔丁隈牧州陳顧翟之好  
禮徐靖為郡薦袁奐之篤學桓範驅傳先舉管寧朱則  
剖符亦稱董直臣才非往哲識媿前修輕塵聽覽伏待  
斧鉞謹表

薦顧協表

時有詔舉士表上召拜通直  
散騎常侍兼中書通事舍人



臣聞貢玉之士歸之潤山論珠之人出于枯岸是以芻  
蕘之言擇於廟廊者也臣府兼記室參軍吳郡顧協行  
稱閭里學兼文武服膺道素雅量邃遠安貧專靜奉公  
抗直傍闕知己志不自營年方六十室無妻子臣欲言  
於官人申其屈滯協必苦執貞退立志難奪可謂東南  
之遺寶矣伏惟陛下未明求衣思賢如渴爰發明詔各  
舉所知臣識非許郭雖無知人之鑒若守固無言懼貽  
蔽賢之咎昔孔愉表韓績之才庾亮薦翟湯之德臣雖

未齒二臣協實無慙兩士

文苑英華梁書作續英華作韓伯並誤孔愉薦韓續見晉

書隱

逸傳

請於州立學校表

臣聞公宮之南四術四教司樂成均六詩六律韶濩既舞羽籥之道行焉黨塾茲備離經之志辨焉故不升嵩霍豈識乾行之峻不臨溟渤安知地載之厚洎乎秦焚金篆周亡玉鏡羣言爭亂諸子相騰書則夏侯歐陽易則神輸道訓詩乃齊魯毛韓傳稱鄒左張夾禮有曲臺

王史之異樂有龍德趙定之殊伏惟陛下撫五辰而建  
五長播九德而導九州容成為厯興景雲之瑞伶倫吹  
律應黃鍾之琯撥亂反正經武也制禮作樂緯文也若  
非六經庖厨百家異饌三墳為瑚璉五典為笙簧豈能  
暴以秋陽紆就望之景濯以江漢播垂天之澤

上忠臣傳表

資父事君實曰嚴敬求忠出孝義兼臣子是以冬溫夏  
清盡事君之節進思將美懷出奉之義義軒改物殷周

受命三能十亂九棘五臣靡不夙夜在公忠為令德若  
使縉雲得姓之子姬昌魯衛之臣是知理合君親孝忠  
一體性與率由因心致極臣連華霄漢憑暉日月三握  
再吐夙奉紫庭之慈春詩秋禮早蒙丹宸之訓宣帝褒  
德麟閣畫充國之形顯宗念功雲臺圖仲華之象

遷荊州輸江州節表

周有掌節之職漢有符節之令所以子孫慷慨忠肅勤  
劬無絕終古有高前載臣自擁麾鶴塞執茲龍節幸逢

銀山自溢玉燭調年雖免茂弘之譏竟微辛毗之勇

召學生教

昔楚王好詩沛王傳易猶且傳之不朽以為盛事况吾親承天旨聞禮聞詩方欲化行南國被于西楚

答左衛將軍王僧辯

時侯景攻沒京城密詔世祖大都督中外諸軍事

大寶元年世祖為荊州刺史猶稱太清四年正月僧辯獲橘三十子共蒂以獻世祖答之

昔文康獻橘十有二子用今方古彼有慙色今景之兇

惡既稔凱歌之聲已及嘉瑞遠臻但增歡慰

三國典畧

遺王僧辯書

僧辯等討侯景軍至巴陵聞郢州陷因留戍之湘東王繹遺僧辯書

賊既乘勝必將西下不勞遠擊但守巴丘以逸待勞無

慮不克

資治通鑑

答江州刺史王僧辯

大寶二年太宗崩僧辯累表勸即尊位世祖答讓

孤以不德天降之災枕戈飲膽扣心泣血風樹之酷萬  
始不追霜露之哀百憂摠萃甫聞伯升之禍彌切仲謀  
之悲若封豕既殲長蛇即戮方欲追延陵之逸軌繼子  
臧之高讓豈資秋亭之壇安事繁陽之石侯景項籍也

蕭棟殷辛也赤泉未賞劉邦尚曰漢王白旗弗懸周發  
猶稱太子蜚龍之位孰謂可躋附鳳之徒既聞來議羣  
公卿士其諭孤之志毋忽

豫章王棟  
景立為帝

### 復答

省示復具一二孤聞天生蒸民而樹之以君所以對揚  
天休司牧黔首攝提合雒以前栗陸驪連之外書契不  
傳無得稱也自阪泉彰其武功丹陵表其文德有人民  
焉有社稷焉或歌謠所歸或惟天所相孤遭家多難大

恥未雪國賊則蚩尤弗翦同姓則有扈不賓卧而思之  
坐以待旦何以應寶歷何以嗣龍圖庶一戎既定罪人  
斯得祀夏配天方申來議也

又答王僧辯等

大寶三年二月王僧辯衆軍發自尋陽世祖  
馳檄告四方及僧辯等平侯景傳其首於江  
陵又奉表勸即  
尊位世祖答之

省表復具一二羣公卿士億兆夷人咸以皇天睠命歸  
運所屬用集寶位于予一人文叔金吾之官事均往願



孟德征西之位且符前說今淮海長鯨雖云授首襄陽  
短狐未全革面太平玉燭爾乃議之

並梁書

辭勸進表

是時巨寇尚存未欲即位四方表勸前後相屬乃下令

大寶二年

大壯乘乾明夷垂翼璿度亟移玉律屢徙四岳頻遣勸  
進九棘比者表聞譙沛未復瑩陵永遠于居于處寤寐  
疚懷何心何顏撫茲歸運自今表奏所由竝斷若有啓  
疏可寫此令施行

勸農令

大寶三年

軍國多虞戎旃未靜青領雖戢黔首宜安時惟星鳥表  
年祥於東秩春紀宿龍歌歲取於南畷况三農務業尚  
看天桃敷水四人而今猶及落杏飛花化俗移風常在  
所急勸耕且戰彌須自許豈直燕垂寒谷積黍自溫寧  
可墮此玄苗坐食紅粒不植驚領空候蟬鳴可悉深耕  
溉種安堵復業無棄民力並分地利班勒州郡咸使遵  
承

侯景平解嚴令

大寶  
三年

軍容不入國國容不入軍雖子產獻捷戎服從事亞夫弗拜義止將兵今凶醜殲夷逆徒殄潰九有既截四海乂安漢官威儀方陳盛禮衛多君子寄是式瞻便可解嚴以時宣勒

赦令

侯景誅傳首江陵斬賊黨王偉等於江陵市下令大寶三年世祖猶稱太清年號

君子赦過著在周經聖人解網聞之湯令自獫狁孔熾長蛇薦食赤縣貼危黔黎塗炭終宵不寐志在雪恥元惡稽誅本屬侯景王偉是其心膂周石珍負背恩義今

竝烹諸鼎鑊肆之市朝但比屯遭寇擾為歲已積衣冠  
舊貴被逼偷生猛士勲豪和光苟免凡諸惡侶諒非一  
族今特闡以王澤削以刑書自太清六年五月二十日  
昧爽以前咸使維新

討侯景馳告四方檄

大寶三年二月王僧辯衆  
軍發自尋陽世祖馳檄

大剝極生災乃及龍戰師貞終吉方制殲豕豈不以侵  
陽蕩薄源之者亂階定龕艱難成之者忠義故羿澆滅  
於前莽卓誅於後是故使桓文之勲復興於周代溫陶

之績彌盛於金行粵若梁興五十餘載平壹宇內德惠  
悠長仁育蒼生義征不服左伊右瀍咸皆仰化濁涇清  
渭靡不向風建翠鳳之旗則六龍驤首擊靈鼉之鼓則  
百神警肅風牧方召之賢衛霍辛趙之將羽林黃頭之  
士獸賁緹騎之夫叱咤則風雲興起鼓動則嵩華倒拔  
自桐柏以北孤竹以南碣石之前流沙之後延頸舉踵  
交臂屈膝胡人不敢牧馬秦士不敢彎弓叶和萬邦平  
章百姓十堯九舜曷足云也賊臣侯景匈奴叛臣鳴鏑

餘嘒懸瓠空城本非國寶壽春畿要賞不踰月開海陵  
之倉賑常平之米撥九府之費錫三官之錢冒干貨賄  
不知紀極敢興逆亂梗我王畿賊臣正德阻兵安忍日  
者結怨江羊遠適單于簡牘屢彰彭生之魂未彌聚斂  
無度景卿之誚已及為虎傳翼遠相招致虔劉我生民  
離散我兄弟我是以董率臯貌躬擐甲冑霜戈照日則  
晨離奪暉龍騎蔽野則平原掩色信與江水同流氣與  
寒風俱憤凶醜畏威委命下吏乞活淮肥苟存徐兗渙

汗既行絲綸爰被我是以班師凱歸休牛息馬賊猶不  
悛遂復矢流王屋兵躔象魏總章之觀非復聽訟之堂  
甘泉之宮永乖避暑之地坐召憲司卧制朝宰矯託天  
命偽作符書重增賦斂肆意剝生者逃竄死者暴尸  
道路以目庶僚鉗口刑戮失衷爵賞由心老弱波流士  
女塗炭臧獲之人五宗及賞搢紳之士三族見誅穀粟  
騰踊自相吞噬慄慄黔首路有銜索之哀蠢蠢黎民家  
有隕山之泣偃師南望無復儲胥露寒河陽北臨或有

穹廬擅帳南山之竹未足言其愆西山之兔不足書其  
罪外監陳瑩之至伏承先帝登遐宮車晏駕奉諱驚號  
五內摧裂州冤本毒無地容身景阻饑既甚民且狼顧  
遂侵軼我彭蠡憑陵我郢邑竊據我江夏掩襲我巴丘  
我是以義勇爭先忠貞盡力斬馘凶渠不可稱筭沙同  
赤岸水若絳河任約泥首於安南北仁面縛於漢口子  
仙乞活於鄢郢希榮敗績於柴桑侯景奔竄十鼠爭穴  
郭默清夷晉熙附義計窮力屈反殺後主畢原鄧郇並



罹禍患凡蔣邢茅皆伏缺鑕是可忍也孰不可容莫府  
據有上流是惟分陝投袂荷戈志在畢命昔周依晉鄭  
漢有虛牟彼惟末屬猶能如此況聯華日月天下不賤  
為臣為子兼國兼家者哉咸以義旗既建宜須總一共  
推莫府寔用主盟粵以不佞謬董連率遠惟國艱不遑  
寧處中權後勁龔行天罰提戈蒙險隕越以之天馬千  
羣長戟百萬驅賁獲之士資智勇之力大楚踰荆山淺  
源度彭蠡舳艫汎水以掎其南輜輶委輸以衝其北華

夷百濮羸糧影從雷震風駭直指建業按劍而叱江水  
為之倒流抽戈而揮皎日為之退舍方駕長驅百道俱  
入夷山殄谷充原蔽野挾輶曳牛之侶拔距礫石之夫  
騎則逐日追風弓則吟猿落鴈捧崑崙而壓卵傾渤海  
而灌熒如駟馬之載鴻毛若奔牛之觸魯縞以此衆戰  
誰能禦之脫復蜂蠆若毒獸窮則鬪謂山益高則四郊  
多壘謂地益遠則三千弗違如彼怒蛙譬諸鼯鼠豈費  
萬鈞無勞百鎰加以日臨黃道兵起絳宮三門既啓五

將咸發舉整整之旗掃亭亭之氣故以臨機密運非賊  
所解奉義而誅何罪不服今遣使持節大都督征東將  
軍開府儀同三司江州刺史尚書令長寧縣開國侯王  
僧辯率衆十萬直掃金陵鳴鼓聒天縱金振地朱旗夕  
建如赤城之霞起戈船夜動若滄海之奔流計其同惡  
不盈一旅君子在野小人比周荷校滅耳匪朝伊夕春  
長狄之喉繫邳支之頸今司寇明罰質缺所誅止侯景  
而已黎元何辜一無所問諸君或世樹忠貞身荷寵爵

羽儀鼎族書勲王府俛眉猾豎無由自効豈不下慙泉  
壤上愧皇天失忠與義難以自立想誠南風乃瞻西顧  
因變立功轉禍為福有能縛侯景及送首者封萬戶開  
國公絹布五萬匹有能率動義衆以應官軍保全城邑  
不為賊用上賞方伯下賞剖符竝裂山河以紆青紫昔  
由余入秦禮同卿佐日磬降漢且珥金貂必有其才何  
卹無位若執迷不反拒逆王師大軍一臨刑茲罔赦孟  
諸焚燎芝艾俱盡宣房河決玉石同沈信賞之科有如

皎日黜陟之制事均白水檄布遠近咸使知聞

即位江陵詔

承聖元年

夫樹之以君司牧黔首帝堯之心豈貴黃屋誠弗獲已而臨蒞之朕皇祖太祖文皇帝積德岐梁化行江漢道映在田具瞻司屬皇考高祖武皇帝明並日月功格區宇應天從民惟睿作聖太宗簡文皇帝地侔啓誦方符文景羯寇憑陵時難孔棘朕大拯橫流克復宗社羣公卿士百辟庶僚咸以皇靈睠命歸運斯及天命不可以

久淹宸極不可以久曠粵若前載憲章令範畏天之威  
筭隆寶歷用集神器于予一人昔虞夏商周年無嘉號  
漢魏晉宋因循以久朕雖云撥亂且非創業思得上繫  
宗祧下惠億兆可改太清六年為承聖元年逋租宿責  
並許弘貸孝子義孫可悉賜爵長徒鑠士特加原宥禁  
錮奪勞一皆曠蕩

蠲免力田詔

下並  
二年

食乃民天農為治本垂之千載貽諸百王莫不敬授民

時躬耕帝籍是以稼穡為寶周頌嘉其樂章禾麥不成  
魯史書其方冊秦人有農力之科漢氏開屯田之利頃  
歲屯否多難薦臻干戈未戢我則未暇廣田之令無聞  
於郡國載師之職有陋於官方今元惡殄殲海內方一  
其大庇黔首庶拯橫流一廛曠務勞心日仄一夫廢業  
為鹵無遺國富刑清家給民足其力田之身在所蠲免  
外即宣勒稱朕意焉

還都建鄴詔

夫爰始居毫不廢先王之都受命于周無改舊邦之頌  
頃戎旃既息關柝無警去魯興歎有感宵分過沛殞涕  
寔勞夕寐仍以瀟湘作亂庸蜀阻兵命將授律指期克  
定今八表又清四郊無壘宜從青蓋之典言歸白水之  
鄉江湘委輸方船連舳巴峽舟艦精甲百萬先次建鄴  
行實京師然後六軍遄征九旂揚旆拜謁瑩陵脩復宗  
社主者詳依舊典以時宣勒

加王僧辯太尉車騎大將軍詔

僧辯平陸納于  
湘州又破齊軍



于東關振旅建鄴  
承聖三年下詔

贊俊遂賢稱于秦典自上安下聞之漢制所以仰協台  
曜俯佐弘圖使持節侍中司徒尚書令都督揚南徐東  
揚三州諸軍事鎮衛將軍揚州刺史永寧郡開國公僧  
辯器宇凝深風格詳遠行為士則言表身文學貫九流  
武該七略頃歲征討自西徂東師不疲勞民無怨讟王  
業艱難實兼夷險宜其燮此中台膺茲上將寄之經野  
匡我朝猷加太尉車騎大將軍餘悉如故

宗懌封信安縣侯手詔

元帝重牧荊州以懌為別駕江陵令及即位擢

為中書侍

郎手詔曰

昔扶柳開國止曰故人西鄉胙土本由賓客况事涉勲庸而無爵賞尚書侍郎宗懌亟有帷幄之謀誠深股肱之寄從我于邁多歷歲時可封信安縣侯邑一千戶

贈杜崱詔

崱京兆舊姓元凱苗裔家傳學業世載忠貞自驅傳江渚政號廉能推轂淺原寔聞清靜奄致殞喪惻愴于懷

可贈車騎將軍加鼓吹一部

### 敕杜龕

顏晃字元明瑯琊臨沂人承聖初為中書侍郎龕為吳興太守專好勇力其所部多輕險少年世祖患之乃使晃管其書翰仍敕龕

卿年時尚少習讀未晚顏晃文學之士使相毗佐造次之間必宜諮稟

陳書

### 敕報司徒王僧辯

僧辯先下辟書引孔奐為左西曹掾除丹陽尹丞元帝於荊州即位徵奐及沈炯僧辯累

表請留帝手敕報之其為朝廷所重如此  
孔奐字休文會稽山陰人入陳顧弘範宮衛

尉炯  
見陳

孔沈二士今且借公

陳書

### 別敕王僧辯

承聖三年十月西魏相宇文黑泰遣兵及岳陽王衆合五萬將襲江陵世祖遣主書李膺徵僧辯於建業為大都督荊州刺史  
別敕僧辯賊而京城陷沒宮車晏駕

黑泰背盟忽便舉斧國家猛將多在下流荆陝之衆悉

非勁勇公宜率貔虎星夜就路倍道兼行赴倒懸也

梁書

與王僧辯帛書

西魏兵伐江陵于謹令築長圍中外信命始絕元帝裂帛為書趣王僧辯入援竟為魏滅

吾忍死待公可以至矣

資治通鑑

忠臣傳序

夫天地之大德曰生聖人之大寶曰位因生所以盡孝  
因位所以立忠事君事父資敬之理寧異為臣為子率  
由之道斯一忠為令德竊所景行且孝子烈女逸民咸  
有別傳至於忠臣曾無述製今將發篋陳書備加論討

忠臣傳諫爭篇序

富貴寵榮人所不能忘也刑戮流放人所不能甘也而士有冒雷霆犯顏色吐一言終知自投鼎鑊取離刀鋸而曾不避者其故何也蓋傷洪茫禹跡毀於一朝赫赫宗周滅成禾黍何者百世之後王化漸頽欽若之信既盡解網之仁已泯徒以繼體所及守器攸歸出則清警傳路處則憑玉負屨事無慙舛意有必從所謂生于深宮之中長于婦人之手未嘗知憂未嘗知懼况惑褒人

之巧笑迷陽阿之妙舞重之以剗斲用之以逋逃亦有  
傾天滅地汙宮瀝社之罪拔本塞源裂冠毀冕之釁於  
是策名委質守死不二之臣以剛腸疾惡之心確乎貞  
一之性不忍見霜露麋鹿栖于宮寢麥穗黍離被於宗  
廟故瀝血抽誠披胃見歎赴焦爛于危年甘滅亡于昔  
日冀桐宮有返道之明望夷無不言之恨而九重懸遠  
百雉嚴絕丹心莫亮白刃先指見之者掩目聞之者傷  
心然後鳴條有不收之魂商郊致白旗之戮

忠臣傳死節篇序

自非識君臣之大體鑒生死之弘分何以能滅七尺之軀殉一顧之感然平路康衢從容之道進危塗險徑忠貞之節興登平路者易為功涉險塗者難為力從容之用世不乏人忠貞之槩時難屢有

孝德傳序

夫天經地義聖人不加原始要終莫踰孝道能使甘泉自涌鄰火不焚地出黃金天降神女感通之至良有可



稱

全德志序

老子言全德歸厚莊周云全德不刑呂覽稱全德之人  
故以全德創其名也此志隆大夫為首伊人有學有辯  
不天不貧寶劔在前鼓瑟從後連環炙輶雍容卒歲駟  
馬高車優游宴喜既令公侯踞掌復使要荒蹶角入室  
生光豈非盛矣若乃河宗九策事等神鉤陽雍雙壁理  
歸玄感南陽樊重高閣連雲北海公沙門人成市咨此

八龍各傳一藝夾河兩郡家有萬石人生行樂止足為  
先但使尊酒不空坐客恒滿寧與孟嘗聞琴承睫淚下  
中山聽樂悲不自禁同年而語也

職貢圖序

元帝善畫為湘東王時諸蕃使者入  
貢圖其形貌服飾次以本國風俗序

曰

竊聞職方氏掌天下之圖四夷八蠻七閩九貉其所由  
來久矣漢氏以來南羌旅距西域憑陵創金城開玉關  
絕夜郎討日逐覩犀甲則建朱崖聞蒲萄則通大宛以

德懷遠異乎是哉皇帝君臨天下之四十載垂衣裳而  
賴兆民坐巖廊而彰萬國梯山航海交臂屈膝占雲望  
日重譯至焉自塞以西萬八千里路之陜者尺有六寸  
高山尋雲深谷絕景雪無冬夏與白雲而共色水無早  
晚與素石而俱貞踰空桑而歷崑吾度青丘而跨丹穴  
災風弱水不革其心身熱頭痛不改其節以故明珠翠  
羽之珍細而弗有龍文汗血之驥却而不乘尼丘乃聖  
猶有圖人之法晉帝君臨寔聞樂賢之象甘泉寫閼氏

之形後宮玩單于之圖臣以不佞推轂上游夷歌成章  
胡人遙集款關蹶角沿泝荆門瞻其容貌訊其風俗如  
有來朝京輦不涉漢南別加訪採以廣聞見名為貢職  
圖云爾

丹陽尹傳序

傳曰大夫受郡漢書曰尹者正也及其用人實難授受  
廣漢和顏接下子高自輔經術孫寶行嚴霜之誅袁安  
留冬日之愛自二京板蕩五馬南渡固乃上燭天文下

應地理爾其地勢可得而言東以赤山為成臯南以長  
淮為伊洛北以鍾山為華臯西以大江為黃河既變淮  
海為神州亦即丹陽為京尹雖得人之盛頗愧前賢而  
盼遇之深多用宰輔皇上受圖負宸寶厯惟新制禮以  
告成功作樂以彰治定豈直四三皇六五帝孕夏陶周  
而已哉若夫位以德叙德以位成每念忝蒞京河茲焉  
四載以入安石之門思勤王之政生真長之室想清談  
之風求瘼餘晨頗多暇景今綴采英賢為丹陽尹傳

洞林序

蓋聞玄枵之野鬼方難測朱鳥之舍神道莫知而緹幔  
曉披即辨黃鍾之氣靈臺夕望便知玉井之色復以談  
乎天者雖絕名言之外存乎我者還居稱謂之中余幼  
學星文多歷歲稔海中之書略皆尋究巫咸之說偏得  
研求雖紫微迢遞如觀掌握青龍顯晦易乎窺覽羨門  
五將亟經玩習韓終六王常所寶愛至如周王白雉之  
筮殷人飛鷲之卜著名聚雪非關地極之山卦有密雲

能擁西郊之氣爰通七聖世經三古山陽王氏真解談  
玄河東郭生纔能射覆兼而兩之竊自許矣

懷舊志序

吾自北守琅臺東探禹穴觀濤廣陵面金湯之設險方  
舟宛委眺玉筍之干霄臨水登山命儔嘯侶中年承乏  
攝牧神州戚里英賢尚冠髦俊蔭真長之弱柳觀茂弘  
之舞鶴清酒繼進甘果徐行長安郡公為其延譽扶風  
長者刷其羽毛於是駐伏熊迴結駟命鄒湛召王祥余

顧而言曰斯樂難長誠有之矣日月不居零露相半素車白馬往矣不追春華秋實懷哉何已獨軫魂交情深宿草故備書爵里陳懷舊焉

懷張纘詩序

纘謚簡憲公

簡憲之為人也不事王侯負才任氣見余則申旦達夕不能已已懷夫人之德何日忘之

高祖武皇帝謚議

臣聞翼善傳聖曰堯仁聖盛明曰舜受禪成功曰禹除



虐去殘曰湯謚者行之跡號者功之表雖賤不誅貴卑  
不誅尊而彰乎名者盛德之嘉號也被於物者治定之  
實錄也斯所以聲名煥乎鍾石昭晰備於絃管者焉伏  
惟天縱欽明惟睿作聖功超三五聲踰七十仰之彌高  
就之彌遠載潛載躍乃武乃文先是水運告終羣后改  
屬乾維罔構地紐如崩祧祀阼危公卿盱食九牧有淪  
胥之悲八表興橫流之歎乃凝威黑水表瑞丹陵雲合  
景從表裏提福受終文祖允恭克讓知黔首不可以無

歸蒼生不可以無主降汾陽之遠志不得已而臨之於是類帝裡宗革命創制禘郊式展殷薦斯潔臨茲大寶化與和氣俱宣扇此王風政與秋霜俱肅言懸日月功格區宇不以紫宸為貴不以黃屋為尊政謚刑措民殷國阜虹旌式卷堡燧載清胥象相因環牯無曠天衢亨泰王道升平南海候風東溟奉賁膏露凝枝慶雲觸石山開蒼壁地出玄珪驃騎把鉞則休屠款塞太尉抗旌則名王麗角聲教所漸泱靈虵之都威令所行通燭龍

之外開庠建序布濩于成均正俗移風氛氲于司樂虛  
納十亂引亮直之規廣闢四門弘招賢之德青衿知擊  
壤之性黃髮恣鼓腹之歡加以鑽味微言研精至道文  
終所牧之典史倚所讀之書無輟萬機日且千遍馳郁  
郁之聲表乾乾之德允所謂皇哉君哉日用而不知者  
矣方且告成岱嶽鏤升中之玉簡昭事梁甫秘禮首之  
金繩而文王明夷事倅往冊黃帝橋山痛深前典萬有  
淪傷三辰掩曜人祇軫慕山海含悲慟切陟方哀深遏

密煩冤荼毒貫切心髓風樹不靜陟岵何期思所以欽  
若九功仰稽七德

全德志論

物我俱忘無貶廊廟之器動寂同遣何累經綸之才雖  
坐三槐不妨家有三徑但接五侯不妨門垂五柳使良  
園廣宅面水帶山饒甘菓而足花卉葆筠篁而玩魚鳥  
九月肅霜時饗田畯三春捧觴乍酬蠶妾酌升酒而歌  
南山烹羔豚而擊西缶或出或處並以全身為貴優之

游之咸以忘懷自逸若此衆君子可謂得之矣

鄭衆論

漢世銜命匈奴困而不辱者二人而已子卿手持漢節  
卧伏冰霜仲師固無下拜隔絕水火况復風生稽落日  
隱龍堆瀚海飛沙皐蘭走雪豈不酸鼻痛心憶雒陽之  
宮陞屑泣橫悲想長安之城闕直以為臣之道義不為  
生事君之節生為義盡豈望拔幽泉出重仞經長樂抵  
未央及還望塞亭來依候火傍觀上郡側眺雲中雖在

已之願自隆而於時之報未盡

皇太子講學碑

皇太子游雷種德重離作兩業冠孟侯道高上嗣宮壇  
累仞高山仰止承華之闥更似通德之門博望之園反  
類華陰之市家丞庶子並入四科洗馬後車俱通六學  
轉金輅而下辟雍晬玉裕而經槐市詳其懸鏡高堂衢  
樽待酌瞻後忽前博文約禮將使東極長男之宮不獨  
銘於銀牘南皮太子之序豈徒擅於金碑

廬山碑序

夫日月麗天皇穹所以貞觀川嶽帶地后土所以惟寧  
廬山者亦南國之德鎮雖林石異勢而雲霞共色長風  
夜作則萬流俱響晨颺曉吟則百嶺齊應東瞻洪井識  
曳帛之在茲西望石梁見指寶之可拾誠後慕類易悲  
山中難久攀蘿結桂多見淹留

立圃牛渚磯碑

竊以增城九重仙林八樹未有船如鴈鶴時度宓妃橋

似牽牛能分織女丹鳳為羣紫桂成列清風韻響即代  
僊歌挂影浮池仍為月浦壁月朝暉金樓啓扉畫船向  
浦錦纜牽磯花飛拂袖荷香入衣山林朝市併覺忘歸

青溪山館碑

原夫法象莫過於天地著明莫過於日月鼓之以雷霆  
潤之以風雨咸秩無文所以名山致祭峻極于天青溪  
山者荆南之中岳也隱隱干霄亭亭無際雲蓋三層如  
在帝臺之側挂林八樹非異景山之徬輕霞亘起影落



照於陽溪清風遠至響猿鳴於巫峽西臨百丈之穴南  
帶千仞之水洪源湛淡長波縈復

隱居先生陶弘景碑銘

昔太和中  
有許遠遊者  
乃雲霄之勝賓  
太虛之選客  
先生規同矩合  
實踵高步  
曩基先構  
即駕胥宇  
千尋危聳  
憑牖以望  
奔星百拱  
高懸倚櫺  
而觀朝日  
飛流界道  
似天漢之橫  
波觸石起  
雲若竒峰  
之出岫  
銘曰肇彼冥默  
翻成協贊  
身託外臣  
心同有亂  
重道尊德  
爰積叡衷  
顧

懷紛射璽問遙通朱楊鬱起華構方崇靜臺冠月輕榭  
迎風嵯嶢高棟宵靄脩攏極望山川周觀京陸碧嶂千  
巖清流萬谷景落重崖煙生岫複

侍中吳平光侯墓誌銘

惟嶽降神表山甫之德敬如君所顯成季之徵潔靜精  
微岐嶷天挺學兼義府談均理窟歷太子洗馬八人掌  
籍為崇賢之領袖五日來朝冠承華之楷模遷豫章內  
史法井鸞峯甘露歲下蕭崖鶴嶺連理成陰徵為太子

左衛率邁疾薨于道頗類陶基民號燕北取譬羊祜巷  
哭荆南副軍早垂隆盼憫其石火瞻斯翠蓋忽變丹旄  
方使桓侯石椁載銘盛夏滕令佳城式鐫韶濩

中書令庾肩吾墓誌

荆山萬重地產卞和之玉隨流千仞水出靈虵之珠故  
能脩茲屈景育斯唐宋掌庾命族世濟琳琅遂昌開國  
蟬聯冠冕父易高尚其道遁肥貞吉關吏早逢夙表真  
人之氣少微晚映還彰隱士之星肩吾氣識淹通風神

閒逸鐘鼓辭林笙簧文苑入為度支尚書任同北斗錫  
韓稜之劔朝此南宮識鄭崇之履余以其為人也瑚璉  
之器無慙垂棘杞梓之材有均廊廟故贈散騎常侍中  
書令蓋旌賢也

侍中新渝侯墓誌銘

爰始降神誕茲初載方琮有燭圓珠無類義若連環文  
同藻繪三分竹使再徙建旗朱帷自舉白鹿隨車武實  
威邊文能懷遠年歌去速時謠來晚昔我往矣千駟連

輶今茲旋旆雙鴈隨舟山迴素桃水導丹旒寂寥原野  
搖落徂秋

特進蕭琛墓誌銘

山東流水關西城市義府詞鋒風飛雲起遊楚宦梁桂  
馥蘭芳蓮花可賦迷迭成章學類五行書倅三篋已研  
金匱兼探玉牒石詞既擬藥社茲同桃李成徑松栢為  
叢天地長久永扇高風

太常卿陸倕墓誌銘

如金有鑛如竹有筠體二方擬知十可鄰兩升鳳詔三  
侍龍樓南皮朝宴西園夜遊詞峰飈豎逸氣雲浮日往  
月來暑流寒襲東耀方遠北芒已及墜露曉團悲風暮  
急

庾先生承先墓誌銘

悠哉掌庾興自陶唐伯舅居晉連鑣渭陽爰斯厥後世  
挺珪璋乃登靈岳言遵洞府乃陟石山將從輕舉實惟  
貞吉寔惟退讓皎皎不羣超超高尚本同壽夭寧論得

喪諸方未遊佳城已望蓬生蔣徑釣罷磻谿擯悲新隴  
挑餘故蹊風翻嶺背月下松西揚名不朽高蹈夷齊

黃門侍郎劉孝綽墓誌銘

蔡墨攸陳有草有茵梁荆世積或魏或秦積善餘慶時  
推俊民孝乎惟孝其德有鄰曰風曰雅文章動神鶴開  
阮瑀鵬翥揚循身茲惟屈扶搖未申人罔石火山有楸  
椿佳城無曙寒野方春

散騎侍郎裴子野墓誌銘

幾原博聞裁為典墳比良班馬等麗卿雲薰蕕既別涇  
渭以分聖皇御極欽賢盱顧儲后特聖降情文苑既匹  
嚴朱復同徐阮如何不憇卜期不遠

東宮後堂仙室山銘

太華削成本擅竒聲峰如雪委巔若蓮生雲除紫塞霞  
通赤城金壇是籙玉記題名鳳依桐樹鶴聽琴聲殿接  
南箕橋連北斗秋河從帶春禽銜綬朱鳥安窻青龍作  
牖



漏刻銘

玉衡稱物金壺博施司南司火未符茲義帝曰欽哉納  
隍斯譬實惟簡在窮神體智宮槐晚合月桂宵暉清臺  
莫爽嶰谷胥依七分六日五祀三微事齊幽贊乃會通  
幾碧海有乾絳川猶竭飛流五色涓涓靡絕龍首傍注  
仙衣俯裂箭不停晷聲無暫輟用天之貞分地之平如  
弦斯直如渭斯清

香爐銘

蘇合氤氲非煙若雲時穠更薄乍聚還分火微難盡風  
長易聞孰云道力慈悲所薰

忠臣傳記託篇贊

太真英挺投袂勤王伯猷蹈節身殞名揚嶷嶷景倩主  
亡與亡嗟乎尚矣惟國之良

忠臣傳諫諍篇贊

子政鏗鏗誠存社稷朱雲折檻遂其姦直

忠臣傳執法篇贊

設官分職咸曰師師彼其之子邦之直司豺狼當道安  
問狐狸昏明有世直道無時

孝德傳皇王篇贊

天子之孝曰聖與仁重瞳表德參漏通神皇矣高祖連  
鑣舜禹天經地義重規沓矩道踰七十聲超三五

孝德傳天性篇贊

生之育之長之畜之顧我復我荅施何時欲報之德不  
可方思涓塵之孝河海之慈廢書歎息泣下漣漣

職貢圖贊

北通玄菟南漸朱鳶交河悠遠合浦迴遄瀚海無際陰  
山接天遐哉鳥穴永矣雞田

祭東耕文

三農九穀為政所先萬箱億庾是曰民天繫稱斲耜書  
美厥田花開杏樹凍解新泉當使黍稷莫莫民翳胥樂  
甘雨祁祁遂及我私我私之熟表裏禔福禔福中田歲  
取十千是薦是養登頌有年

釋奠祭孔子文

粵若宗師猗歟乃聖惟岳降神惟天所命上善如水至人若鏡

祭顏子文

欽哉體一亞彼至人乍分介石時知落鱗不先稱寶席上為珍致虛守靜曲巷安貧欽風味道其德有鄰

山水松竹格

夫天地之名造化為靈設奇巧之體勢寫山水之縱橫

或格高而思逸信筆妙而墨精由是設粉壁運神情素  
屏連隅山脉濺瀑首尾相映項腹相近丈尺分寸約有  
常程樹石雲水俱無正形樹有大小叢貫孤平扶疎曲  
直聳拔凌亭乍起伏于柔條便同文字

闕

或難合於破墨體向異於丹青隱隱半壁高潛入  
冥插空類劒陷地如坑秋毛冬骨夏蔭春英炎緋寒碧  
暖日涼星巨松沁水噴之蔚同褒茂林之幽趣割雜草  
之芳情泉源至曲霧破山明精藍觀宇橋約關城行人

犬吠獸走禽驚高墨猶綠下墨猶蘋水因斷而流遠雲  
欲墜而霞輕桂不疎于胡越松不難于弟兄路廣石隔  
天遙鳥征雲中樹石宜先點石上枝柯末後成高嶺最  
嫌林刻石遠山大忌學圖經審問既然傳筆法秘之勿  
泄于戶庭

敬帝

名方智字慧相元帝第九子封晉安王江陵陷司空陳霸先立之在位三年禪于陳

改元紹泰大赦詔

王室不造嬰罹禍釁西都失守朝廷淪覆先帝梓宮播

越非所王基傾弛率土罔戴朕以荒幼仍屬艱難泣血  
枕戈志復讎逆大恥未雪夙宵鯁憤羣公卿尹勉以大  
義越登寡闇嗣奉洪業顧惟夙心念不至此庶仰憑元  
靈傍資將相克清元惡謝冤陵寢今隆命載新宗祊更  
祀慶流億兆豈予一人可改承聖四年為紹泰元年大  
赦天下内外文武賜位一等

修孔祀詔

太平二年

夫子降靈體詰經仁緯義允光素王載闡立功仰之者



彌高誨之者不倦立忠立孝德被蒸民制禮作樂道冠  
羣后雖泰山頽峻一簣不遺而泗水餘瀾千載猶在自  
皇圖屯阻祀薦不修奉聖之門胤嗣殲滅敬神之寢簋  
簋寂寥永言聲烈寔兼欽愴外可搜舉魯國之族以為  
奉聖後并繕廟堂供備祀典四時薦秩一皆遵舊



梁文紀卷四

欽定四庫全書

集部  
梁文紀卷五

詳校官庶吉士臣瑚圖禮

主事銜臣徐以坤覆勘

總校官進士臣楊懋珩

校對官中書臣王鍾泰

謄錄監生臣周世燦

欽定四庫全書

梁文紀卷五

明 梅鼎祚 編

昭明太子統

字德施武帝長子立為皇太子中大通三年薨

答晉安王綱書

得五月二十八日疏并詩一首省覽周環慰同促膝汝  
本有天才加以愛好無忘所能日見其善首尾裁淨可  
為佳作吟玩反覆欲罷不能相如奏賦孔璋呈檄曹劉  
異代並號知音發歎凌雲興言愈病嘗謂過差未以信

然一見來章而樹謏忘悔方證昔談非為妄作炎涼始  
質觸興自高覩物興情更向篇什昔梁王好士淮南禮  
賢遠致賓游廣招英俊非唯籍甚當時故亦傳聲不朽  
必能虛己自來慕義含毫屬意差有起予攝養得宜與  
時無爽耳既責成有寄居多暇日彀核典墳漁獵詞林  
上下數千年間無人致足樂也知少行游不動亦靜不  
出戶庭觸地丘壑天游不能隱山林在目中冷泉石鏡  
一見何必勝於傳聞松塢杏林知之恐有逾就吾靜然

終日披古為事汎觀六籍雜玩文史見孝友忠烈之跡  
觀治亂驕奢之事足以自慰足以自言人師益友森然  
在目嘉言誠至無俟旁求舉而行之念同乎此但清風  
朗月思我友於各事藩維未克崇棣興言屈此夢寐增  
勞善護風寒以慰懸想指復立此促遲還書某疏

知之句有

誤

答湘東王繹求文集及詩苑英華書

得疏知須詩苑英華及諸文製發函伸紙閱覽無輟雖

事涉烏有義異擬倫而清新卓爾殊為佳作夫文典則累野麗亦傷浮能麗而不浮典而不野文質彬彬有君子之致吾嘗欲為之但恨未遑耳觀汝諸文殊與意會至於此書彌見其美遠兼邃古傍槩典墳學以聚益居焉可賞吾少好斯文迄茲無倦談經之暇斷務之餘陟龍樓而靜拱掩鶴闥而高臥與其飽食終日寧游思於文林或日因春陽其物韶麗樹花發鶯鳴和春泉生暄風至陶嘉月而嬉游藉芳草而眺矚或朱炎受謝白藏

紀時玉露夕流金風時扇悟秋山之心登高而遠託或  
夏條可結倦於邑而屬詞冬雪千里覩紛霏而興詠密  
親離則手為心使昆弟宴則墨以硯露又愛賢之情與  
時而篤冀同市駿庶匪畏龍不追子晉而事似洛濱之  
游多愧子桓而興同漳川之賞漾舟玄圃必集應阮之  
儔徐輪博望亦招龍淵之侶校覈仁義源本山川旨酒  
盈壘嘉穀溢俎曜靈既隱繼之以朗月高春既夕申之  
以清夜並命連篇在茲彌博又往年因暇搜採英華上



下數十年間未易詳悉猶有遺恨而其書已傳雖未為  
精覈亦粗足諷覽集乃不工而並作多麗汝既須之皆  
遣送也某啟

通一作達舉一作暨飽  
一作餘時扇一作多扇

與何肩書

某叩頭叩頭昔園公道勝漢盈屈節春卿明經漢莊北  
面況乃義兼乎此而顧揆不肖哉但經途千里眇焉莫  
因何嘗不夢姑胥而鬱陶想具區而杼軸心往形留於  
茲有年載矣方今朱明受謝清風戒寒想攝養得宜與

時休適耽精義味玄理息囂塵玩泉石激揚碩學誘接  
後進志與秋天競高理與春泉爭湔樂可言乎豈與口  
厭芻豢耳聆絲竹之娛者同年而語哉方今秦階端平  
天下無事修日養夕差得從容鑽閱六經汎濫百氏研  
尋物理領畧清言既以自慰且以自傲而才性有限思  
力匪長熱疹懣懣多慙過目釋卷便忘是以蒙求之懷  
於茲彌軫聊遣典書陳顯宗申其蘊結想敬缺宜此豈  
盡意某叩頭

受藝文作在樂可言乎有二句熱疹  
懣懣作熱疾懣其神風眩蔽其體

何胤答啟

胤啟。函書陳顯宗至奉八月十二日令旨。恩洽庸陋。  
榮被蓬華。開紙披讀。伏深慶幸。胤性愛山泉。情篤魚鳥。  
而縱鷗未狎。入獸相驚。兼年齒衰莫。荒徑榛梗。既無語  
稼之客。寧有論書之賓。緘默畎畝。棲息丘壑。秀木清潭。  
於茲永已。伏惟明睿之德。誕縱自天。忠孝之規。不待因  
習。猶復留神六經。降意百氏。同仁博古等物。筵間闢承  
華。而延儒雅。掃黃闈。而引文學。嘉美聿宣。無思不勸。胤

無解頤之談屢蒙獎飾之重匪南皮之舊貫荷存問之恩私銜慈永極罔知攸寔不任銘佩屏營之情謹附啟

謝謹啟

並昭明太子集

與殷鈞書

鈞字季和陳郡長平人歷國子祭酒

鈞為臨川內史母憂去職居喪過禮太子憂之手書誡諭

知比諸德哀頓為過又所進殆無一溢甚以酸耿迴然一身宗莫是寄毀而滅性聖教所不許宜微自遣割俯存禮制饘粥果蔬少加勉強憂懷既深指故有及并令

繆道臻口具

梁書

陳書姚察傳察母韋氏喪制通除後主遣中書舍人司馬申宣旨誠喻曰知

此哀毀過禮甚用為憂卿迴然一身宗莫是寄毀而滅性聖教所不許宜微自遣割以存禮制憂懷既深故有此及按梁書本姚思廉撰思廉乃察之子不應陳後主所誠諭其父者乃竄入殷鈞傳中此不可曉

殷鈞答書

奉賜手令并繆道臻宣旨伏讀感咽肝心塗地小人無情動不及禮但稟生厄劣假推年歲罪戾所鍾復加橫疾頃者綿微守盡晷漏目亂玄黃心迷哀樂惟救危苦未能以遠理自制薑桂之滋實聞前典不避梁肉復忝

今慈臣亦何人降此憂慙謹當循復聖言思自補續如

脫申延實由亭造

並梁書

與張纘論張緬書

纘見後

緬字元長范陽方城人歷拜太子洗馬中舍人遷御史中丞侍中卒太子與緬弟纘書

賢兄學業該通莅事明敏雖倚相之讀墳典卻穀之敦詩書惟今望古蔑以斯過自列公朝二紀將及義惟僚屬情實親友文筵講席朝游夕宴何曾不同茲勝賞共此言寄如何長謝奄然不追且年甫強仕方申才力摧

苗落穎彌可傷惋念天倫素睦一旦相失如何可言言及增哽擘筆無次

始興王憺喪禮令

舊事以東宮禮絕傍親書翰並依常儀太子意以為疑命

僕射劉孝綽議其事僕射徐勉左率周捨家令陸襄並同孝綽議太子下令司農卿明山賓步兵校尉朱异議稱慕悼之解宜終服月於是令付典書遵用以為永準

劉孝綽議

案張鏡撰東宮儀記稱三朝發哀者踰月不舉樂鼓吹寢奏服限亦然尋傍絕之義義在去服服雖可奪情豈

無悲鏡歌輟奏良亦為此既有悲情宜稱兼慕卒哭之後依常舉樂稱悲竟此理例相符謂猶應兼慕請至卒哭

令

張鏡儀記云依士禮終服月稱慕悼又云凡三朝發哀者踰月不舉樂劉僕射議云傍絕之義義在去服服雖可奪情豈無悲卒哭之後依常舉樂稱悲竟此理例相符尋情悲之說非止卒哭之後緣情為論此自難一也



用張鏡之舉樂棄張鏡之稱悲一鏡之言取捨有異此  
自難二也陸家令止云多歷年所恐非事證雖復累稔  
所用意常未安近亦常經以此問外由來立意謂猶應  
有慕悼之言張豈不知舉樂為大稱悲事小所以用小  
而忽大良亦有以至如元正六佾事為國章雖情或未  
安而禮不可廢鏡吹軍樂比之亦然書疏方之事則成  
小差可緣心聲樂自外書疏自內樂自他書自己劉僕  
射之議即情未安可令諸賢更共詳衷

貽明山賓令

山賓字孝若平原高僧紹子

山賓遷散騎常侍為青冀二州大中正東宮新置學士又以山賓居之俄以本官兼國子祭酒初山賓在州所部平陸縣不稔啟出倉米以贍人後刺史檢州曹失簿書以山賓為耗闕有司追責籍其宅入官山賓默不自理更市地造宅太子聞築室不就令并詩

明祭酒雖出撫大藩擁旄推轂珥金拖紫而恒事屢空  
聞構宇未成今送薄助并貽詩曰平仲古稱奇夷吾昔  
擅美令則挺伊賢東秦固多士築室非道傍置宅歸仁  
里庚桑方有係原生今易擬必來三選人將招五經士

與殷芸令

山賓歷為國子博士以本官權攝北兖州事  
及辛太子為舉哀賻錢布與前司徒左長史  
殷芸  
令

北充信至明常侍遂至殞逝聞之傷怛此賢儒術該通  
志用稽古溫厚淳和倫雅弘篤授經以來迄今二紀若  
其上交不諂造膝忠規非顯外迹得之胃懷者蓋亦積  
矣攝官連率行當言歸不謂長往眇成疇日追憶談緒  
皆為悲端往矣如何昔經聯事理當酸愴也

與晉安王令

攝北兖州事明山賓尋陽太守到洽太常卿陸倕新安太守張率並相繼殂沒昭明與王

令

到洽字茂沿彭

城武

原人餘並見前

明北兖到長史遂相係凋落傷怛悲惋不能已已去歲  
陸太常殂沒今茲二賢長謝陸生資忠履貞冰清玉潔  
文該四始學徧九流高情勝氣貞然直上明公儒學稽  
古淳厚篤誠立身行道始終如一倘值夫子必升孔堂  
到子風神開爽文義可觀當官莅事介然無私皆海內

之後又東序之祕寶此之嗟惜更復何論但游處周旋  
並淹歲序造膝忠規豈可勝說幸免祇悔實二三子之  
力也談對如昨音言在耳零落相仍皆成異物每一念  
至何時可言天下之實理當惻愴近張新安又致故其  
人文筆弘雅亦足嗟惜隨弟府朝東西日久尤當傷懷  
也比人物零落特可傷惋屬有今信乃復及之

並梁書  
按近

張新安一段復載張率  
傳尺牘但錄率傳所載

謝勅賚地圖啟

漢氏輿地形茲未擬晉世方丈比此非妙匹之長樂惟  
畫古賢傳之未央止圖將帥未有洞該八藪混觀六合  
域中天外指掌可求地角河源戶庭不出豈問千秋自  
識烏桓之地脫逢壯武方著博物之書

藝文  
類聚

十二月啟

太簇正月

宋大觀間南湖杜門換錦帶  
補注與今昭明集句字小異

伏以北斗周天送玄冥之故節東風拂地起青陽之芳  
辰梅花舒兩歲之裝柏葉汎三光之酒飄飄餘雪入簫

管以成歌皎潔清永對蟾光而寫鏡敬想足下神游書  
帳性縱琴堂談叢發流水之源筆陣引崩雲之勢昔時  
文會長思風月之交今日言離永歎參商之隔但某執  
鞭賤品耕鑿庸流沈形南畝之間屏迹東臯之上長懷  
盛德聊吐愚衷謹憑黃耳之傳佇望白雲之信

夾鍾二月

伏以節應佳辰時登令月和風拂迥淑氣浮空走野馬  
於桃源飛少女於李徑花明麗月光浮竇氏之機鳥呀

芳園韻響王喬之管敬想足下優游泉石放曠烟霞尋  
五柳之先生琴樽雅興謁孤松之君子鸞鳳騰翮誠萬  
世之良規實百年之令範但某席戶幽人蓬門下客三  
冬勤學慕方朔之雄才萬卷常披習鄭玄之逸氣既而  
風塵頓隔仁智並非非無衰侶之憂誠有離羣之恨謹  
伸數字用寫寸誠

姑洗三月

伏以景逼徂春時臨變節啼鶯出谷爭傳求友之音翔



蕊飛林競散佳人之鱗魚游碧沼疑呈遠道之書燕語  
雕梁狀對幽閨之語鶴帶雲而成蓋遙籠大夫之松虹  
跨澗以成橋遠現美人之影對茲節物寧不依然敬想  
足下聲馳海內名播雲間持郭璞之毫鷺詞場月白吞  
羅含之彩鳳辯囿日新但某山北逸人牆東隱士龍門  
退水望冠冕以何年鷁路頽風想簪纓於幾載既違語  
嘿且阻江湖聊寄八行之書代申千里之契

注本吞羅含句在郭

前璞

中呂四月

伏以節屆朱明晷鍾丹陸依依簪蓋俱臨帝女之桑鬱  
鬱丹城並挂陶潛之柳梅風拂戶牖之內麥氣擁宮闕  
之前敬想足下聲聞九皋詩成七步涵蚌胎於學海卓  
爾超羣蘊抵鵲於文山儼然孤秀但某窮途異縣岐路  
他鄉非無阮籍之悲誠有楊朱之泣每遇秋風振響鶉  
鷺子夏之夜夜月流輝鵲繞將軍之樹既乖連璧之契  
終隔斷金之情中心藏之卑誠至矣今因去雁聊寄芻

堯如遇回鱗希垂玉翰

蕤賓五月

伏以麥隴移秋桑律漸暮蓮花汎水艷如越女之顰顰  
葉漂風影亂秦臺之鏡炎風以之扇戶暑氣於是盈樓  
凍雨洗梅樹之中火雲燒桂林之上敬想足下追涼竹  
徑托蔭松間彈伯牙之素琴酌嵇康之綠酒縱橫流水  
醺酲顏山實君子之佳游乃王孫之雅事但某沈疴漳  
浦臥病泉山頓懷劉幹之勞鎮抱相如之酷是知枯榮

莫測生死難量驗風燭之不停如水泡之易滅聊申弊  
札以代勞人佇覩芳詞希垂愈病

札一作  
禮誤

### 林鍾六月

伏以三伏漸終九夏將謝螢蜚腐草光浮帳裏之書蟬  
噪繁柯影入機中之鬢濯枝遷而潦溢芳槿茂而發榮  
山土焦而流金海水沸而漂爍敬想足下藏形月府遁  
跡冰牀披莊子之七篇逍遙物外玩老聃之兩卷恍惚  
懷中但某白社狂人青緇末學不從州縣之職聊立松

鶴之間時假德以為鄰或借書而取友三十年之獨鶴  
暫逐雞羣九萬里之孤鵬權潛燕侶既非得意正可忘  
言諸不具伸應俟面會

月府一作夜府

夷則七月

伏以素商驚辰白藏屆節金風曉振偏傷征客之心玉  
露夜凝直泣仙人之掌桂吐花於小山之上梨翻葉於大  
谷之中故知節物變衰草木搖落敬想足下時稱獨步  
世號無雙萬頃澄波黃叔度之器量千尋穉幹嵇中散

之楷模但某一介庸才三隅頑學懷經問道不遇披雲  
負笈尋師罕逢見日俯仰興歎形影自憐不知龍前不  
知龍後鶯鵬雖異風月是同幸矣擇交希垂影拂鶯一作鶯

誤

### 南呂八月

伏以一歎分飛三秋限隔遐思盛德將何以伸白雲斷  
而音信希青山暝而江湖遠敬想足下羽儀勝瞻領袖  
嘉賓傾玉醅於風前弄瓊駒於月下但某登山失路涉

海迷津聞猿嘯而寸寸斷腸聽鳥聲而雙雙下淚當以  
黃花笑冷白羽悲秋既傳蘇子之書更汎陶公之酌聊  
因三鳥畧叙二難面會取書不能盡述或叨鳳念不黜  
魚緘

無射九月

伏以宿昔親朋平生益友不謂窮通有分雲雨將乖既  
深伐木之聲更問采葵之詠屬以重陽變叙節景窮秋  
霜抱樹而擁柯風拂林而下葉金堤翠柳帶星采而均

凋紫塞蒼鴻追風光而結陣敬想足下秀標東箭價重  
南金才過吞鳥之聲德邁懷蛟之智但某衡門賤士甕  
牖微生既無白馬之談且乏碧雞之辯歎分飛之有處  
嗟會面以無期聊申布服之言用述併糧之志

應鍾十月

伏以節屆玄靈鍾應陰律愁雲拂岫帶枯葉以飄空朔  
氣浮川映危樓而疊迥胡風起截耳之凍趙日興曝背  
之思敬想足下山岳鍾神星辰挺秀潛明晦跡隱於朝



市之間縱法化人不混鄉閭之下但某陋巷孤游穿牆  
自活終朝息爨若孔子之為貧竟日停炊如范生之在  
職牛衣當被畏見王章犢鼻親操恐逢犬子雖此慚賤  
而不羞貧綺服有時此言何述

黃鍾十一月

伏以日往月來灰移火變暫乖語嘿頓隔秦吳既傳蘇  
李之書更共范張之志冷風盛而結鼻寒氣切而凝唇  
虹入漢而藏形鶴臨橋而送語彤雲垂四面之葉玉雪

開六出之花敬想足下世號冰壺時稱武庫命長袂而  
留客施大被以招賢酌醇酒而拒切骨之寒溫獸炭而  
祛透心之冷但某持戈日久荷戟年深揮白刃而萬定  
死生引虹旗而千決成敗退龍劍而却步月下開營進  
鯨鼓而橫行雲前起陣徒勞斬斫豈用功勲諸不具陳  
謹伸微意

大呂十二月

伏以分手未遙翹心且積引領企踵朝夕不忘眷友思

仁行生未捨既屬嚴風極冷苦霧添寒冰堅漢地之池  
雪積袁安之宅敬想足下棲神鶴駕眷想龍門披玩之  
間願無捐德但某種瓜賤士賣餅貧生入爨竈以揚聲  
不逢蔡子駕鹽車而顯迹罕遇孫陽徒懷叩角之心終  
想曝腮之患既為久要聊吐短章紙盡墨窮何能懇露

錦帶書 藝林伐山引錦帶書迎侯賓啟水  
候錦纜陸遊華鑒又云虹鏡開炎耀暑方畏

請停吳興丁役疏

吳郡屢以水災不熟有上言  
當漕大瀆以瀉浙江中大通

二年春詔遣前交州刺史王弈假節發吳郡  
吳興義興三郡民丁就役太子上疏高祖優

詔以  
喻馬

伏聞當發王弈等上東三郡民丁開漕溝渠導泄震澤  
使吳興一境無復水災誠矜恤之至仁經畧之遠旨暫  
勞永逸必獲後利未萌難覩竊有愚懷所聞吳興累年  
失收民頗流移吳郡十城亦不全熟惟義興去秋有稔  
復非常役之民即日東境穀價猶貴劫盜屢起所在有  
司不皆聞奏今征戍未歸強丁疎少此雖小舉竊恐難  
合吏一呼門動為民蠹又出丁之處遠近不一比得齊集已

妨蠶農去年稱為豐歲公私未能足食如復今茲失業  
慮恐為弊更深且草竊多伺候民間虛實若善人從役  
則抄盜彌增吳興未受其益內地已罹其弊不審可得  
權停此工待優實以行聖心垂矜黎庶神量久已有在  
臣意見庸淺不識事宜苟有愚心願得上啟

發南史作  
遣常作恒

以行作  
以不

文選序

式觀元始眇觀玄風冬穴夏巢之時茹毛飲血之世世

質民淳斯文未作逮乎伏羲氏之王天下也始畫八卦  
造書契以代結繩之政由是文籍生焉易曰觀乎天文  
以察時變觀乎人文以化成天下文之時義遠矣哉若  
夫椎輪為大輅之始大輅寧有椎輪之質增冰為積水  
所成積水曾微增冰之凜何哉蓋踵其事而增華變其  
本而加厲物既有之文亦宜然隨時變改難可詳悉嘗  
試論之曰詩序云詩有六義焉一曰風二曰賦三曰比  
四曰興五曰雅六曰頌至於今之作者異乎古昔古詩

之體今則全取賦名荀宋表之於前賈馬繼之於末自  
茲以降源流實繁述邑居則有憑虛亡是之作戒畋遊  
則有長楊羽獵之制若其紀一事詠一物風雲草木之  
興魚蟲禽獸之流推而廣之不可勝載矣又楚人屈原  
含忠履潔君匪從流臣進逆耳深思遠慮遂放湘南耿  
介之意既傷壹鬱之懷靡愬臨淵有懷沙之志吟澤有  
憔悴之容騷人之文自茲而作詩者蓋志之所之也情  
動於中而形於言闕雖麟趾正始之道著桑間濮上亡

國之音表故風雅之道粲然可觀自炎漢中葉厥塗漸  
異退傳有在鄒之作降將著河梁之篇四言五言區以  
別矣又少則三字多則九言各體互興分鑣並驅頌者  
所以游揚德業褒讚成功吉甫有穆若之談季子有至  
矣之歎舒布為詩既言如彼總成為頌又亦若此次則  
箴興於補闕戒出於弼匡論則析理精微銘則序事清  
潤美終則誅發圖像則讚興又詔詰教令之流表奏箋  
記之列書誓符檄之品吊祭悲哀之作答客指事之制



三言八字之文篇辭引序碑碣志狀衆制鋒起源流間  
出譬陶匏異器並為入耳之娛黼黻不同俱為悅目之  
玩作者之致蓋云備矣余監撫餘閒居多暇日歷觀文  
囿泛覽儒林未嘗不心遊目想移晷忘倦自姬漢以來  
眇焉悠邈時更七代數逾千祀詞人才子則名溢於縹  
囊飛文染翰則卷盈乎緗帙自非畧其蕪穢集其清英  
蓋欲兼功大半難矣若夫姬公之籍孔父之書與日月  
俱懸鬼神爭奧孝敬之準式人倫之師友豈可重以芟

夷加之剪截老莊之作管孟之流蓋以立意為宗不以能文為本今之所撰又亦畧諸若賢人之美辭忠臣之抗直謀夫之話辯士之端水釋泉涌金相玉振所謂生狙丘議稷下仲連之却秦軍食其之下齊國留侯之發八難曲逆之吐六奇蓋乃事美一時語流千載概見墳籍旁出子史若斯之流又亦繁博雖傳之簡牘而事異篇章今之所集亦所不取至於記事之史繫年之書所以褒貶是非紀別異同方之篇翰亦已不同若其讚論

之綜緝辭采序述之錯比文華事出於沈思義歸乎翰藻故與夫篇什雜而集之遠自周室迄於聖代都為三十卷名曰文選云爾凡次文之體各以彙聚詩賦體既不一又以類分類分之中各以時代相次

陶淵明集序

夫自銜自媒者士女之醜行不收不求者明達之用心是以聖人韜光賢人遁世其故何也含德之至莫踰於道親己之切無重於身故道存而身安道亡而身害處

百齡之內居一世之中倏忽比之白駒寄寓謂之逆旅  
宜乎與大塊而榮枯隨中和而任放豈能戚戚勞於憂  
畏汲汲役於人間齊謳趙舞之娛八珍九鼎之食結駟  
連鑣之遊侈袂執圭之貴樂則樂矣憂則隨之何倚伏  
之難量亦慶弔之相及智者賢人居之甚履薄冰愚夫  
貪士競此若泄尾閭玉之在山以見珍而招破蘭之生  
谷雖無人而猶芳莊周垂釣於濠伯成躬耕於野或貨  
海東之藥草或紡江南之落毛譬彼鵲雛豈競鳶鳴之

肉猶斯雜縣寧勞文仲之牲至如子常甯喜之倫蘇秦  
衛鞅之匹死之而不疑甘之而不悔主父偃言生不五  
鼎食死即五鼎烹卒如其言亦可痛矣又有楚子觀周  
受折於孫滿霍侯驂乘禍起於負芒餐餐之徒其流甚  
衆唐堯四海之主而有汾陽之心子晉天下之儲而有  
洛濱之志輕之若脫屣視之若鴻毛而況於他乎是以  
聖人達士因以晦跡或懷玉而謁帝或披裘而負薪鼓  
楫清潭棄機漢曲情不在於衆事寄衆事以忘情者也

有疑陶淵明之詩篇篇有酒吾觀其意不在酒亦寄為  
跡焉其文章不羣詞采精拔跌宕昭章獨超衆類抑揚  
爽朗莫之與京橫素波而旁流干青雲而直上語時事  
則指而可想論懷抱則曠而且真加以貞志不休安道  
苦節不以躬耕為恥不以無財為病自非大賢篤志與  
道汙隆孰能如此者乎余愛嗜其文不能釋手尚想其  
德恨不同時故更加搜求粗為區目白壁微瑕者惟在  
閒情一賦揚雄所謂勸百而諷一者卒無諷勸何必搖

其筆端惜哉亡是可也并粗點定其傳編之於錄常謂有能讀淵明之文者馳競之情遣鄙吝之意祛貪夫可以廉懦夫可以立豈止仁義可蹈爵祿可辭不勞復傍遊太華遠求柱史此亦有助於風教爾

媒一作謀榮枯作盈虛幸作卒

爵祿可辭上有抑乃二字

### 七契

奚斯逸士肥遁棄榮蓮峯於焉剡跡灌木是用庇形口不悅於五味心不娛於八聲鄙巢父之為哲笑蘇門之

為英鵠蓋龍旂初不關意鳳吹鼉鼓終不屑情跨四海  
而擅美邁三古而振名居山林而不返終無慮而無營  
於是辯博君子詞若涌泉言踰却秦之魯辯超稷下之  
田欲抑則大鵬垂翅欲抗則尺鷃冲天聞逸士之懷寶  
乃拂衣而造焉駕兩駟之如手乘輕車之若流爰自畿  
甸徑造山周傍瞻虹見俯眺雲浮鳴禽聒耳零露蔽眸  
唯一壑之為阻無三逕之可求於是披榛陟路援蘿踐  
萼雖跋涉而不休覩逸士之所託其為居也寂焉而靡所



聽暝然而無所瞻三椿蔓戶八桂攢簷華門烏宿圭竇狐  
潛風來室搖霧下窗霑實人迹之罕至逸士於此而獨淹  
君子曰蓋聞智士不希狷介仁者莫有迷邦傳說終受  
殷爵呂望遂啟齊封余敬吐誠而畢慮子能留志而見  
從乎逸士曰鄙人固陋自潛幽數必枉話言敬聆金口  
君子曰若夫夾鍾之節春景依遲碧樹初蕊綠草含  
滋春臺之樂信矣熙熙於是百金之士萬鍾之家招  
搖隆富徵集豪華駕紫騮之馬乘青蓋之車出自高

字行無狹斜陶嘉月而結交遊藉芳辰而宴朋友望宜  
春以隨肩入長楊以攜手金盤薦美藉之珍玉杯汎縹  
清之酒義曰和神事非爽口於是娛樂未終留光將夕  
飛觴引滿奮袖舉白投轄安坐歡甚促膝以會雕蟲之  
賓加有清談之客論同炙輶藻若凌雲戴憑不能高其  
說相如不能擅其文無玄不析無細不分搦簡玉振下  
筆蘭芬乃亦六郡未擬非直三蜀蔑聞屬虞泉氣晚朗  
月潛曜清卮未闌宵景方照奇舞遞作名謳斯召約綽

妍姿嬋媽宜笑綺縠風吹珠璣星耀齊竿揚參差之響  
趙瑟奏鏗鏘之妙茲亦遊讌之至娛子能借此而為樂  
乎逸士曰輕蕩遊觀非予所耽得性行樂從好山南

君子曰輔性和神實為至味非直方今所重乃亦自古  
攸貴不周之和調腸補胃雜以龍肝饌炙豹舌猩唇劉  
氏之醢范公之麟鷁出雲際鰓來江岷蒲俎芬馥古聖  
所珍其酒則蒼梧九醞中山千日取譬湛露擬之飴蜜  
百味交馳三雅間出若其珍異則脩筵斯溢千品萬類

不可詳悉西母靈桃南楚萍實東陵之瓜北燕之栗湖  
畔之柿江陰之橘張掖白柰恒陽黃梨河東洗犬隴蜀  
蹲鴟並怡神甘口窮美極滋加以伊公調和易氏燔爨  
傳車渠之椀置青玉之案瑤俎既已麗奇雕盤復為美  
玩子能與予而享之乎逸士曰甘脆腸腐五味口爽伊  
人素蓄無羨方丈

君子曰千里之駒自出余吾伯樂所選伏波所模通肩  
合相平腹應圖激電比速躡影競驅騰黃弗敢擬駿赤

免莫與爭途異態蹁跹奇姿猗倚逸足驟反遊雲移駛  
形函遊華日不暇徙乃飾金羈之昭晰加以玉鞍之輝  
煥連乾麗靡輕蘇絜爛逸氣既為勝矚美飾重成壯觀  
蹠蹠紅塵膺流絳汗風起龍驤灰聲鳥散自古迄今人  
誰不玩逸士能就余而乘之乎逸士曰遊逸輕佻策馬  
爭驅粵今樂靜豈能感娛

君子曰先形飾體莫過鮮衣冠鷄鶡之長纓若魯雲之  
零霏琅玕珎珎言飾於背飄颻輕裾是用曜軀方空之

綬弱紈之蕉暑纔炙而已却風未至而先搖既唯照麗  
兼以輕鐙似朝霞之發彩若夕景之舒光至夫杪秋既  
謝寒緒中人則輕狐稱美豐貂表珍斯乃赤也所以去  
魯孟嘗所以出秦步光之妙櫛具之華君子武備所用  
禦邪標以珠玉飾以蓮花其任則百冶精銳利擬秋霜  
豈止在身為美服襲稱臧固乃龍躍於襄水見氣於南  
昌幽通神化其妙難詳將與逸士服之以相狎逸士曰  
紵絺避暑緼袍禦冬鮮麗綺靡未之或從

君子曰是有喬桐抽葉青蔥結根善地擢幹華嵩栖鳳  
魯山之側藏龍平陵之東拂靈韞之高雲鼓捎殺之雄  
風茗亭萬仞實造天中乃使匠石運斤班輸琢錘製起  
玄脩形踰綠綺與金石而鏗鏘共絲竹而曼靡托北方  
之佳人命高樓之杞氏間以已隴才僮邯鄲妙妓騁獸  
為之輟馳飛禽為之不徙加以荆和之飾照耀柘絲之  
絃激揚三聲吐韻四結流唱辭高薰奏響溢芝房竹來  
解谷律寫歸昌再鼓而玄鶴集九成而儀鳳翔初音魚

踊餘妙統梁何止田文慷慨劉靖心傷而已哉中山青  
曲若折而和揚美目以流盼啟玉齒而安歌歌曰陽阿  
奏兮激楚流望洛水兮有好仇縱輕椎兮汎龍舟將與  
逸士陟彼華堂憩諸閤館玉宇明華文階燦爛璇題昭  
晰珠簾彪煥身托璫瑁之筵目寓瓊華之玩且以悅諸  
和性之樂豈非綺麗之觀哉逸士曰居茲四郭寧辨五  
音靡曼不極君子弗欽雖間瞻辭之銳無會野人之心  
君子曰白藏肅殺天高野清玉樹始落金蕊初榮幕燕



北反沙雁南征實秋收之美節將校獵以娛情使樞無  
伏馬巷靡遺行執戈於羊眠之野彎弧於曠浪之陰養  
由輕盼則林推鷖獸蒲且效技則虛下翔禽騰猿蹶其  
足號虎不擇音掩兔羴鹿既蔑古之烏有填坑滿谷亦  
眇昔之上林至於輕繳纔飛則連鴻解羽微纖始放則  
並鱗失波豈論玄泉之則寧願將邀之歌弭節言旋禽  
不可算周旋眺覽足為京觀子雖山栖其從此玩逸士  
曰解網垂仁殷王美則聞聲不食孔聖淑音害蠹類而

為樂豈君子之用心

君子曰蓋聞地美養禾君仁愛士澤被無垠光照郊鄙  
蒲輪必鄒魯之儒宗紆青必洛陽之才子大漢愧得人  
之盛有周慚以寧之美萬國若翕從四海同使指刑措  
弗用囹圄斯空既講禮於太學亦論詩於石渠戈有載  
戢史無絕書銅律應度玉燭調和黃髮擊壤青衿興歌  
元帥奇士庠序鴻生求禮儀之汲汲行仁義之明明隆  
采椽之義却璫珥之榮當朝有仁義之睦邊境無烟塵

之驚信如四氣明並三光厨菱挺茂堦棠吐芳瑞鹿搗  
素祥熊耀黃靈禽樂園儀鳳栖堂太平之瑞寶鼎樂協  
之應玉羊丹鳥表色玉露呈瀼野絲垂木嘉苗貫桑固  
以德苞子姒道邁虞唐六合寧泰四字咸康不煩一戟  
東甌膜拜詎勞一卒西域獻琛鹿蠡稽顙以悛惡樓蘭  
面縛而革音吾皆去鼻飲之穴棄烏舉之深固以澤流  
無外恩被遐方福比嵩岱道則穹蒼豈有聞若斯之化  
而藏其皮冠哉逸士曰鄙人寡識守節山隅不聞智士

之教將自潛以靡軀請伏道而從命願開志以滌慮

華陽隱居墓銘碑

維大同二年龍集景辰克明三月壬寅朔十二日癸丑  
巳時華陽洞陶先生蟬蛻於茅山朱陽館先生諱弘景  
字通明春秋八十有一屈伸如恒顏色不變有制贈以  
中散大夫謚曰貞白先生遣舍人主書監護喪事十四  
日寔於雷平之山若夫真以歸空為美道以無涯為真  
不知悅生大德所以為生不知思死谷神所以不死妙

矣哉隱顯變化物莫能測既而岫開析石天墜玉棺銀  
書息簡流珠罷竈九節麗於中天千和焚於地下仙官  
有得朋之喜受學振空谷之悲余昔在粉壤早逢此上  
之術今選元良屢稟浮丘之教握留符而惻愴思化杖  
而酸辛乃為銘曰

無名曰道不死為仙亦有元放兼稱稚川逃形解化自  
昔同然猗歟夫子受籙歸玄梨傳苑吏書因賈船虎車  
煦景蛻拂凌煙餘花灼爍春澗潺湲鬱鬱茅嶺悠悠洞

天三仙白鵠何時復旋

十四日下有已時二字無涯為真作無形為貴惡死作惡死中

天作空中空谷作臨  
谷照作照鵠作鶴

### 爾雅制法則贊

惟斯法則信如四時嚴此刑政刑輕罪疑霜威已振民不敢欺

### 蟬贊

茲蟲清潔惟露是餐寂寞秋序咽嘶夏闌定伊不美曜  
彼華冠

弓矢贊

弓用筋角矢製良工亦以觀德非止臨戎揚葉命中猿

墮長空

有司奏崇丁貴嬪

貴嬪諱令光譙國人世居襄陽高祖臨州納之生昭明太

子及太子定位有司奏  
備典章禮數同於太子

禮母以子貴皇儲所生不容無敬宋泰豫元年六月議  
百官以吏敬敬帝所生陳太妃則宋明帝在時百官未  
有敬臣竊謂母以子貴義著春秋皇太子副貳宸極率

土咸執吏禮既盡禮皇儲則所生不容無敬但帝王妃  
嬪義與外隔以理以例無致敬之道也今皇太子聖睿  
在躬儲禮夙備子貴之道抑有舊章王侯妃主常得通  
信問者及六宮三夫人雖與貴嬪同列並應以敬皇太  
子之禮敬貴嬪宋元嘉中始興武陵國臣並以吏敬敬  
所生潘淑妃路淑媛貴嬪於宮臣雖非小君其義不異  
與宋泰豫朝議百官以吏敬敬帝所生事義正同謂宮  
閤施敬宜同吏禮詣神虎門奉牋致謁年節稱慶亦同



如此婦人無閭外之事賀及問訊賤什所由官報聞而已夫婦人之道義無自專若不仰繫於夫則當俯繫於子榮親之道應極其所榮未有子所行而所從不足者也故春秋凡王命為夫人則禮秩與子等列國雖異於儲貳而從尊之義不殊前代依准布在舊事貴嬪載誕元良克固大業禮同儲君實惟舊典尋前代始置貴嬪位次皇后爵無所視其次職者位視相國爵比諸侯王此貴嬪之禮已高朝列況母儀春宮義絕常算且儲妃

作配率由盛則以婦踰姑彌乖從序謂貴嬪典章太子  
不異

安成王秀

字彥達太祖第七子歷雍州刺史

儻度教

秀為江州刺史時盛夏水汎長津梁斷絕外司請依舊儻度收其價直秀下教

給船而已

刺史不德水潦為患可利之乎

招隱逸教

秀為荊州刺史立學校招隱逸下教

夫鶉火之禽不匿影於丹山昭華之寶乍耀采於藍田

是以江漢有濯纓之歌空谷著來思之咏弘風聞道靡  
不由茲處士河東韓懷明南平韓望南郡庾承先河東  
郭麻並脫落風塵高蹈其事兩韓之孝友純深庾郭之  
形骸枯槁或橡飯菁羹惟日不足或葭牆艾席樂在其  
中昔伯武貞堅就仕河內史雲孤劭屈志陳留豈曰場  
苗實惟攻玉可加引辟并遺喻意既同魏侯致禮之請  
庶無辟疆三緘之歎

衡陽王元簡

字熙遠武帝弟衡陽王  
暢子襲封歷郢州刺史

獻劒奏

天監七年元簡為會稽太守上言

餘姚縣掘地得劒二口又於縣東江水中得劒一口文

漫若雌雄

太平御覽引梁書

南平王恪等

字敬則襲父偉爵尚書令司空揚州刺史

勸世祖即位牋

世祖初封湘東王為荊州刺史太清三年侯景寇沒京師密詔世祖為侍中假黃鉞大都督中外諸軍事司徒承制明年十一月南平王恪侍中臨川王大欵桂陽王大成散騎常侍江安侯圓正侍中左衛將軍張瑄司徒左長史曇等府州國一千人奉牋勸進世祖下

令辭  
讓

竊以嵩嶽既峻山川出雲大國有藩申甫惟翰豈非皇  
建斯極以位為寶聖教辨方春名與器是知太尉佐帝  
重華表黃玉之符司空相土伯禹降玄圭之錫伏惟明  
公大王殿下命世應期挺生將聖忠為令德孝實天經  
地切應韓寄深旦奭五品斯訓七政以齊志存社稷功  
濟屯險夷狄內侵枕戈泣血鯨鯢未掃投袂勤王能使  
遊魂請盟以屈膝醜徒銜璧而警氣親蕃外叛釁均吳

楚義討申威兵不血刃湘波自息非築杜弢之壘岷山  
離貳不伐劉表之城九江致梗二別殊派纔命戈船底  
定滯霍沂流窮討路絕窺窬胡兵侵界鐵馬霧合神規  
獨運皆即梟懸翻同翅折遂修職貢梁漢合契肆犀利  
之兵巴漢俱下竭驍勇之陣南通五嶺北出力原東夷  
不怨西戎即叙可謂上流千里持戟百萬天下之至貴  
四海之所推也今海水飛雲崑山起燎魏文悲樂推之  
歲韓宣歎成禮之日陽臺之下獨有冠蓋相趨夢水之

傍尚致車輿結轍薶麥兩穗出於南平之邦甘露泥枝  
降乎當陽之境野蠶自績何謝歐絲閭田生稻寧殊雨  
粟莫非品物咸亨是稱文明光大豈可徽號不彰於彝  
典明試不陳乎車服者哉昔晉鄭八周尚作卿士蕭曹  
佐漢且居相國宜崇茲盛禮顯答羣望恪等稽尋甲令  
博詢惇史謹再拜上進位相國總百揆竹使符一別准  
恒儀仗金斧以翦逆暴乘玉輅而定社稷傍羅麗於日  
月貞明合於天地扶危翼治豈不休哉恪等不通大體

自昧伏奏以聞

世祖令答

數鍾陽九時惟百六鯨鯢未翦寤寐痛心周粵天官秦  
稱相國東至於海西至於河南次朱鵠北漸玄塞率茲  
小宰弘斯大德將何用繼蹤曲阜擬跡桓文終建一匡  
肅其五拜雖義屬隨時事無虛紀傳稱皆讓象著鳴謙  
瞻言前典再懷哽噎

並梁書

邵陵王綸

字世調高祖第六子



隱居貞白先生陶君碑

夫夜光結綠非肱筐之恒珍逸羽翔鱗豈園池之近玩  
寧期心於遠大蓋不知其所以然也是以潁陽高蹈洗  
耳於唐朝漢陰貞栖滅跡於周代盛德風流有自來矣  
應期而曜質者其在茲乎先生名弘景字通明本冀州  
平陽人也其先自帝堯陶唐氏之後胤堯治冀州平陽  
故因居止龍馬見五色之符欽明表八彩之瑞光宅於  
天下允釐於庶職洪源曼遠系緒綿長漢興陶舍為高

祖右司馬子青翟位至丞相後至漢末南渡始居丹陽  
七世祖濬仕吳為鎮南將軍荊州刺史祖降宋南中郎  
叅軍事父貞寶司徒建安王國侍郎並立履清約博涉  
文史先生含元精之和氣蓄陵飈之雅姿兼宣七善總  
修九德行仁蹈義嶽峙淵渟牆仞無以覩清濁不能測  
道風與星漢同高勝氣與烟霞共遠六歲便解書能屬  
文七歲讀孝經毛詩論語數萬言曼倩幼習典墳公幹  
少誦詩賦方之於古彼有多慚是以岐嶷流聲黃中著

稱有鄉人得葛洪神仙傳見淮南八公諸仙事乃嘆曰  
讀此書便使人有凌雲之氣於是寢興諷誦晨興不輟  
年二十七為宜都王侍讀總知管記事榜道求賢焚林  
招士朝難其選是日得人阮瑀之書記不足扶衡孫楚  
之才辭何以捧轂齊代好治宮室方修苑囿清溪舊觀  
更就起築仍奉表上頌辭事兼美邁彼樂職之篇踰乎景  
福之製帝省覽久之益以為善除奉朝請恪居官次夙  
夜惟寅春朝秋請是棧樸者也先生本不希榮常欲

辭退乃與親友書曰疇昔之意不願處人間年登四十志畢山藪今三十六矣時不我借知幾其神乎無為自苦明年遂拜表解職抽簪東都之外解組北山之陽同稷丘之栖真慕留侯之却粒便具舟楫永言東邁朝廷錫問時賢餞別祖以二疎招茲四皓超然輕舉異世符同爾杖策孤征游踐山嶽既而到于句容登於茅嶺以此地神仙之宮府靈異之栖托往不能返遂卜居焉先生曰夫子云隱居以求其志行義以達其道吾聞其語

未見其人我今義通無復其一請同求志之業故自稱  
隱居亦猶稚川之抱朴士安之玄晏倚巖栖隱依林遁  
跡交柯結宇剡徑為門懸崖對溜悲吟灌木深壑絕峭  
組織烟霞枕石漱流水禽無撓採藥耦耕野獸不亂道  
遙間曠放浪陵山嗒然若喪確乎難拔屬齊末道消天  
命既否水闕穀洛地震由辰先生靜思冥數豫識微兆  
於是近遠書問悉皆杜絕昔乃聞之夏甫今則見之先  
生我大梁休運應期受天明命三辰開朗四海寧謐先

生奉表稱慶於是信問復通天監以來常有勅旨供給藥餌不乏歲時渥澤湛恩莫之與比先生七年暫游南嶽茲山也譬閭風之地軸若崑陵之天鎮八桂傍臨九純間設樹有琅玕草生車騎遺世獨往是用忘歸一十年有敕遣左右司徒惠明徵還先生茅山別給廨宇軒后之降精天老漢帝之致禮河宗況于茲日弗能尚也養志山阿多歷年所攝生既善冥祥亦降猛獸不據魑魅莫逢庭無荆棘遠同關里階吐神泉逕茂松柏於是

羽人徘徊仙客上下鸞鳳游集芝英豐潤大造佛像爰  
及寫經起塔招僧備諸供養自誓道場受菩薩法夢登  
七地又得佳名具以啟聞蒙敕許可葛玄之夢見開士  
朱鸞之遠望尊儀何以擬茲通感匹此徵應以大同三  
年歲次丙辰三月壬寅朔日癸丑告別年化春秋八十  
有一天子嗟惜儲皇軫悼有詔稱譽追贈中散大夫謚  
曰貞白先生禮也以其月十四日寔於丹陽郡句容縣  
雷平山若軒轅之葬衣冠如王喬之藏劒鳥化於茲日

可得偶焉先生器宇凝深思識精瞻含章貞吉不修廉隅年將中壽匪踰於矩眉目疏朗儀貌鮮潔實亡勸沮多行德惠恹惜光景愛好墳籍篤志勵節白首彌至若乃淮南鴻寶之訣隴西地動之儀太乙遁甲之書九章歷象之術幼女銀鈎之敏允南風角之妙太倉素問之方中散琴操之法咸悉搜求莫不精詣爰及卞射荀綦蘇卜管筮一見便曉皆不用心張華之博物馬鈞之巧思劉向之知微葛洪之養性兼此數賢一人而已門人



恒法閨等慕遙風於緱氏繪遺像於橋陽勒玄碑而相  
質騰絳霄之流芳乃為銘曰

留烏表化棄劍凝神徘徊紫氣照耀丹鱗厥跡猶在餘  
風可遵誰其嗣此淵哉淑人高行邁種盛德日新朗猶  
懸鏡儼似貞筠身以弘道行不違仁昔游纓綬頤頤縉  
紳厭乎匡救勞彼問津亦既解組乃襲山中遠尋丘壑  
高蹈風塵情無緬世隱不隔真結宇依巖貞棲茂草水  
玉留年精華却老乃有令問兼斯壽考泉過危庭峯臨

竊洞露凝蘭階雲生桂棟日斜欄席花落窗甕尚平未  
反王孫不旋海桑交易陵谷貿遷豐碑有樹遺烈無騫

與湘東王繹書

侯景亂世祖徵兵湘州刺史河東王譽拒命世子方等征之敗

死圍譽長沙既久內外斷絕雍州刺史武陵王紀率師東下時綸為南徐州刺史加大都督討景至郢州聞譽圍急欲往救之為軍糧不繼遂止與世祖書世祖復書陳河東有罪不可解圍之狀綸省書流涕曰天下之事一至於斯世祖聞其強盛乃遣王僧辯帥舟師一萬以逼綸譽城陷被誅綸討景兵敗走汝南為魏人所害

伏以先朝聖德孝治天下九親雍睦四表無怨誠為國

政實亦家風惟余與爾同奉神訓宜敦旨喻共承無改  
且道之斯美以和為貴況天時地利不及人和豈可手  
足肱支自相屠害日者聞譽專情先訓以幼陵長湘峽  
之內遂至交鋒方等身遇亂兵斃於行陣殞於吳局方  
此非冤聞問號怛惟增推憤念以兼悼當何可稱吾在  
州所居遙隔雖知其狀未喻所然及屆此藩備加覲訪  
咸云譽應接多替兵糧閉壅弟教亦不悛故興師以伐  
譽未識大體意斷所行雖存急難豈知竊思不能禮爭

復以兵來蕭牆興變體親成敵一朝至此能不嗚呼既有書問雲雨傳流噂嗜其間委悉無因詳究方今社稷危恥創巨痛深人非禽蟲在知君父即日大敵猶強天讐未雪余爾昆季在外三人如不匡難安用臣子惟應剖心嘗膽泣血枕戈感誓蒼穹憑靈宗祀晝謀夕計共思康復至於其餘小忿或宜寬貸誠復子憾須臾將奈國寃未逞正當輕重相推小大易奪遣無益之情割下流之悼弘豁以理通識勉之今已喪鍾山復誅猶子將

非揚湯止沸吞冰療寒若以譽之無道近遠同疾弟復效尤攸非獨罪幸寬於衆議忍以事寧如使外寇未除家禍仍構料今訪古未或弗亡夫征戰之理義在克勝至於骨肉之戰愈勝愈酷捷則非功敗則有喪勞兵損義虧失多矣侯景之軍所以未窺江外者正為藩屏盤固宗鎮强密若自相魚肉是代景行師景便不勞兵力坐致成效醜徒聞此何快如之又莊鐵小豎作亂久挟觀寧懷安二侯以為名號當陽有事充掣殊廢備境第

聞征伐復致分兵便是自於瓜州至於湘雍莫非戰地  
悉以勞師侯景卒承虛藉豐浮江豕突豈不表裏成虞  
首尾難救可為寒心其事已切弟若苦陷洞庭兵戈不  
戢雍川疑迫何以自安必引進魏軍以求形援侯景事  
等內癰西秦外同瘤腫直置關中以為咽氣況復貪狼  
難測勢必侵吞弟若不安家國去矣吾非有深鑒獨能  
弘理正是採藉風謠博叅物論咸以為疑皆欲解體故  
耳自我國五十許年恩格玄穹德彌赤縣雖有逆難未

亂邕熙溥天率土忠臣憤慨比屋罹禍忠義奮發無不  
抱甲負戈衝冠裂眦咸欲剗刃於侯景腹中所須兵主  
唱耳今人皆樂死赴者如流弟英畧振遠雄伯當代惟  
德惟藝資文資武拯溺濟難朝野咸屬一匡九合非弟  
而誰豈得自違物望致招羣譴其間患難具如所陳斯  
理皎然無勞請箸驗之以實寧須確引吾所以間闕險  
道出自東川政謂上游諸藩必連師狎至庶以殘命預  
在行間及到九江安北兄遂泝流更上全由餽饋懸斷

卒食半菽阻以菜色無因進取侯景方延假息復緩誅  
刑信增號憤啟處無地計瀟湘穀粟猶當紅委若阻弟  
嚴兵惟事交切至於運轉恐無暇發遣即日萬心慊望  
惟在民天若遂等西河時事殆矣必希令弟豁照茲途  
解汨川之圍存社稷之計使其運輸糧儲應贍軍旅庶  
叶力一舉指日寧泰宗廟重安天下清復推弟之功豈  
非幸甚吾才懦兵寡安能為役所寄令弟庶得申情朝  
聞夕死萬殞何恨聊陳聞見幸無怪焉臨紙號迷諸失



次緒

梁書

藝文載云先朝聖德孝治天下九親維睦四表無怨誠為國政實亦家風弟弘識遠鑒無俟

傍說事重情切不能默已勞兵損義虧失多矣可謂吞  
水療寒揚湯止沸侯景所以未敢窺兵江外正為藩屏  
盤固宗鎮強密若自相魚肉是謂代景行師昔廉藺二  
虎且猶不鬪況弟與湘雍方須叶力惟親惟急萬倍於  
斯同怨同恥尤甚昔事豈得各恣目前不思久遠安臥  
積薪日待焚熾狂夫尚猶阻之智者反致其惑所冀聽  
識一聞斯悟與前語小異

責王僧辯書

綸大修鎧仗將討侯景湘東王繹惡之遣僧  
辯等帥舟師東趣江郢聲言拒任約且云送  
邵陵王還江陵軍至鸚鵡洲司馬劉龍虎等  
潛送質於僧辯綸遣其子將兵擊之以書責

僧辯僧辯送書於繹繹  
令進軍綸軍潰走武昌

將軍前年殺人之姪今歲伐人之兄以此求榮恐天下

不許

資治通鑑 姪謂河東王譽僧辯討斬之

謝令賚馬啟

連翩絕景沃若追風超渥水之形踰大宛之狀荷傳西  
蕃將達宮閭無任城之氣勇降東平之嘉錫何以揚名

沙漠仰稱隆慈戀德銘心矚恩雨淚

藝文類聚

讓丹陽尹初表

臣進非民譽退異宗英尸居戎號已紊彝典況京兆五  
守西漢難追河南二尹東京罕繼審已循涯自知莫可  
街談巷議尤見不勝

祀魯山神文

敬奠魯君之靈竊以首山鬱律表二叔之清風趙國隱  
淪擅三公之靈迹北坂祠城流光夜起東嶺叢室甘雨  
晝零故能徵應不騫介福無爽金壇玉宇是衆妙之遊  
遨丹崖翠幄信靈人之響像霓裳孔蓋轉日車而競前

駕象乘豹載靈旗而總集江妃漢女含睇來趨湘娥洛  
嬪宜言在側鳴璆撫劒浹席徘徊絳節陳竽滿堂繁會  
奠椒懷楮之歡傳卮代舞之樂桂醕溢於羽樽蕙肴盈  
於蘭藉既醉既飽景福攸同不震不騰神保是格魚鼈  
之薦已畢慶報之澤攸先願化昌而俗阜俾多祐之在  
旃同匪石之無轉欣滯穗之有年惟東皇兮戾止等南  
山而不騫

贈言賦序

張雲麾問望之美作牧南蕃維舟江漢留連飲餞發邁  
有期會面無日依依別袂恨恨江干古人贈別以言聊  
為贈言賦

忠壯世子方等

字實相元帝長子為  
都督征河東王溺死

散逸論

方等有俊才性愛林泉特好散逸母徐  
妃以嫉妬失寵世祖因惡方等方等懼

故述論以  
申其志焉

人生處世如白駒過隙耳一壺之酒足以養性一簞之  
食足以怡形生在蓬蒿死葬溝壑瓦棺石槨何以異茲

吾嘗夢為魚因化為鳥當其夢也何樂如之及其覺也何憂斯類良由吾之不及魚鳥者遠矣故魚鳥飛浮任其志性吾之進退恒存掌握舉手懼觸搖足恐障若使吾終得與魚鳥同遊則去人間如脫屣耳

### 啟父湘東王

方等母徐妃失寵意不自安會高祖欲見諸王長子世祖遣方等入侍方等欣然升舟行至錄水值侯景亂世祖召之方等啟云云世祖省書歎息知無還意乃配步騎使援京師

昔申生不愛其死方等豈顧其生

梁書

臨賀王正德

字公和武帝弟臨川王宏子初武帝養為子及昭明立封西豐侯進臨賀

通武帝啟

侯景反立正德為主攻拔建業見武帝請還為王復令正德通啟正德有怨言矯詔殺之

前為景所擒使攝四海辭不獲免權總萬機今景既入

輔乞解僭濫以王還邸

魏書

蕭昱

字子真武帝從父弟歷晉陵太守

上武帝請解職表

昱志願邊州高祖以其輕脫不許遷給事黃門侍郎上表

答詔

夏初陳啟未垂採照追懷慙懼實戰胸心臣聞暑雨祁  
寒小人猶怨榮枯寵辱誰能忘懷臣藉以往因得預枝  
戚之重緣報既雜時逢坎壈之運昔在齊季義師之始  
臣乃幼弱粗有識慮東西阻絕歸赴無由雖未能負戈  
擐甲實銜淚憤懣潛伏東境備履艱危首尾三年亟移  
數處雖復飢寒切身亦不以凍餒為苦每涉驚疑惶怖  
失魄既乖致命之節空有項領之憂希望開泰冀蒙共  
樂豈期二十餘年功名無紀畢此身骸方填溝壑丹誠



素願溘至長罷俯自哀憐能不傷歎夫自媒自衒誠哉  
可鄙自譽自伐實在可羞然量已揆分自知者審陳力  
就列寧敢空言是以常願一試屢成干請夫上應玄象  
實不易叨錦不輕裁誠難其製過去業障所以致乖算  
測聖監既謂臣愚短不可試用豈容久居顯禁徒穢黃  
樞忝竊稍積恐招物議請解今職乞屏退私門伏願天  
照特垂允許臣雖叨榮兩宮報効無地方違省闔伏深  
戀悚

武帝答蕭昱手詔

昱表如此古者用人必前明試皆須績用既立乃可自  
退之高昔漢光武兄子章與二人並有名宗室就欲習  
吏事不過章為平陰令興為緱氏宰政事有能方選郡  
守非直政績見稱即是光武猶子昱之才地豈可比類  
焉往歲處以淮南郡既不肯行續用為招遠將軍鎮北  
長史襄陽太守又以邊外致辭改除招遠將軍永嘉太  
守復云內地非願復問晉安臨川隨意所擇亦復不行

解巾臨郡事不為薄數有致辭意欲何在且昱諸兄遞居連率相繼推轂未嘗缺歲其同產兄景今正居藩鎮朕豈厚於景而薄於昱正是朝序物議次第若斯於其一門差自無愧無論今日不得如此昱兄弟昔在布衣以處成長於何取立豈得任情反道背天違地孰謂朝廷無有憲章特是未欲致之於理既表解職可聽如啟昱兄景昂並為刺史

鄱陽嗣王範

字世儀鄱陽王恢子  
嗣爵歷合州刺史

題舊琵琶

範愛奇玩古嘗得舊琵琶題以示湘東王作賦和之

齊竟陵世子範嗟人往物存攬筆為詠

南史案此梁都陽王世子而

云齊竟陵世子不可曉



梁文紀卷五